

فريق التفريغ بموقع الطريق إلى الله  
يقدم

## اليوم الثاني والعشرون من "سلسلة الطريق إلى القرآن"

(باللهجة المصرية)

لفضيلة الشيخ : الدكتور / حازم شومان



رابط المادة : <http://www.way2allah.com/modules.php?name=Khotab&op=Details&khid=129>

بسم الله والصلاة والسلام على رسول الله

الحمد لله وكفى وصلاة وسلاما علي عباده الذين اصطفى ، يعني كل يوم التحدي بيزيد أكثر وأكثر يا جماعه ، إحنا بادئين أهو أربعة إلا ربع ، ومعانا أربع سور من أعظم سور القرآن الكريم : معانا سورة الأحزاب ومعانا سبأ ومعانا فاطر ومعانا ياسين ، إحنا هنجاول في هذا اليوم إن إحنا ندوق ، يعني هندوق بس من كل سورة كده طبعا إحنا لسة بنتكلم في الشوط اللي بيكلم عن هيمنة الله علي كل شيء وقدره الله المبهرة ، ٨ سور ورا بعض ، ٨ سور في العقيدة بيركزوا على نقطة أساسية وهيا أد إيه الله قادر ، أد إيه الله سبحانه وتعالى قدرته مبهرة في الكون ، عايزين نخرج من ال ٨ سور دول بمعرفه حقيقية بقدره الله سبحانه وتعالى ، ولكن قلنا فيه عبادة حقيقية ال ٨ سور بيركزوا عليها ، وعلي أد حظك منها على أد ما تقدر تعيش مع ال ٨ سور دول وقلنا هي عبادة إيه ؟ **التدبر في خلق الله سبحانه وتعالى**

يعني سورة الأحزاب بتكلم عن إيه يا جماعة ؟ الواقع اللي بنعيش فيه ، الأحزاب ، لما الأحزاب يجتمعوا على أهل الحق ، لما الأحزاب يجولك من المشرق والمغرب ، لما يعملوا عشانك أنت حلف وارسو وحلف شمال الأطلسي وأحلاف عسكرية ، وتحالفات عسكرية ما بين إسرائيل والهند وأسرائيل ومين وأمريكا ومين ، كل ده عشان إيه ؟ عشان لما ييجوا يحاربوك أو وهم فعلا يحاربوك، كلهم تلاقي نص دول العالم بعنت الطائرات بتاعتها للعراق ، ده مش دول الأحزاب بس ، ده فيه الأحزاب بتاعة المنافقين ، مش بتاعة الكفار ، المنافقين ؟ بتاعة إيه ؟ آه الجرايد الإعلامية : الدستور والفجر والقاهرة الجرائد والصحف الصفراء ، اللي بتضرب في الإسلام من تحت لتحت !!! اللي بتؤدى إلى انحراف الشباب !!! جرائد صفراء كلها عايزين يشيعوا الفاحشة في المجتمع !!! زي بعض برامج التليفزيون : شافكي وما سواها ، البرامج بتاعة الضرب في الإسلام ، اللي بتركز كل مرة على موضوع يضربوا بيه هذا الدين ، وفي الآخر يقولوا إحنا بندافع عن الإسلام وسماحة الإسلام ونور الإسلام

### الأحزاب أجمعوا !!!!

فسورة الأحزاب يا جماعة بتكلم على الواقع اللي إحنا عايشين فيه ، أما الأحزاب تجتمع على الدين تخيلوا لما الأحزاب أجمعت علي رسول الله صلى الله عليه وسلم ، ٦ آلاف من غطفان و ٤ آلاف من مكة و القبائل المجاورة لمكة ، عشره آلاف واحد جاين علي رسول الله صلى الله عليه وسلم في المدينة ، ١٠٠٠٠ واحد !!! تخيلوا المسلمين كان حالتهم شكلها إيه ؟

المفروض يكون فيه خطة عامة ، وفي ثغور مفتوحة تقوله سد ده أو ده ، ما عدتش فيه خلاص ، كل واحد اللي يقدر يعمل أى حاجة يعملها ، تخيلوا إن الوضع وصل لهذه الدرجة يا جماعة !!! اللي يقدر يعمل حاجة يعملها ،

طب إليه الحاجة ؟ ماعدتش ، خلاص كل الثغور مفتوحة والأخطار من فوقكم ومن أسفل منكم ، لدرجة إن ماعدتش فيه أى ترتيب ممكن البشر يعملوه ، ربنا هو الذى يرتب هنا ، ربنا هو الذى يدافع سبحانه وتعالى هنا وصلت الدرجة بالصحابه - صحابه رسول الله صلى الله عليه وسلم - أن لما الرسول قال " **ألا رجل يأتيني بخبر القوم ، جعله الله معي يوم القيامة ؟** " صحيح مفيش ولا واحد من الصحابة قام ، يعنى حتى بعد موت الرسول صلى الله عليه وسلم واحد من الصحابة قاعد مع ناس من التابعين فيقولوه ده إحنا لو كنا مع النبي كنا عملنا وسوينا ، فأما ذكرهم بالموقف ده قاهم إحنا كنا مع النبي ويقولنا اللي يقوم معايا يوم القيامة وما فيش ولا واحد قام ، لحد لما الرسول هو اللي كلف حذيفة رضي الله عنه بالمهمة

## كرب

تخيلوا يا جماعة من شدة الكرب ٣ آلاف واحد خارجين مع النبي عليه الصلاة والسلام ، بعد أيام الغزوة كانوا ٣٠٠ واحد بس إزاي ؟؟ أول ما أفتح الثغر الجنوبي للمدينة ، الثغر الشمالي خلاص سدناه بالخندق ، الثغر الجنوبي عليه بني قريظة ، قاموا بني النضير رايحين لبني قريظة وقعدوا يسولوا ليهم خيانة النبي صلى الله عليه وسلم ، فجأة المدينة بقت مفتوحة من فوق ومن تحت ، حصل أيه للصحابه ؟

ياه يا جماعة ، حصل انقلاب هائل في حياة الصحابة وفي حياة المنافقين ، وحصل زلزال أدى إلى إن ظهر فعلا مين المنافق ، ومين اللي في قلبه مرض ، ومين المؤمن الثابت " **يَا أَيُّهَا الَّذِينَ آمَنُوا اذْكُرُوا نِعْمَةَ اللَّهِ عَلَيْكُمْ إِذْ جَاءَكُمْ جُنُودٌ فَأَرْسَلْنَا عَلَيْهِمْ رِيحًا وَجُنُودًا لَمْ تَرَوْهَا ۚ وَكَانَ اللَّهُ بِمَا تَعْمَلُونَ بَصِيرًا** " الأحزاب : ٩ " **إِذْ جَاءَكُمْ مِنْ فَوْقِكُمْ** " وافتتح ثغر اليهود " **وَمِنْ أَسْفَلَ مِنْكُمْ وَإِذْ زَاغَتِ الْأَبْصَارُ** " الأحزاب : ١٠ مانتاش عارف الخطر هيجيلك مين ؟ يمين ولا شمال ولا فين ! " **وَبَلَغَتِ الْقُلُوبُ الْحَنَاجِرَ** " الأحزاب : ١٠ من شدة خفقان القلب من الخوف القلب أتخلع من مكانه كأنه بلغ الحنجرة " **وَتَطَّنُونَ بِاللَّهِ الظُّنُونَا** " الأحزاب : ١٠ هو ربنا سابنا ولا أيه ؟ ربنا تخلى عنا والا أيه ؟ هو الإسلام جنبنا لغاية هنا وبعد كدة سابنا ولا أيه ؟ " **هُنَالِكَ ابْتُلِيَ الْمُؤْمِنُونَ وَزُلْزِلُوا زِلْزَالًا شَدِيدًا** " الأحزاب : ١١

## المنافقون في الصورة

" **وَإِذْ يَقُولُ الْمُنَافِقُونَ وَالَّذِينَ فِي قُلُوبِهِمْ مَرَضٌ مَا وَعَدَنَا اللَّهُ وَرَسُولُهُ إِلَّا غُرُورًا** " الأحزاب : ١٢ بدأ يظهر المنافقين على حقيقتهم ، يعنى في سورة النساء تفتكروا لما اكلمنا ، قولنا إن اليهود كانوا هم البطل اخوري في السورة ، هنا اليهود بدأوا يتضائلوا ، والمنافقين بقوا البطل اخوري في السورة ، عشان كدة سورة الأحزاب دى بتركز جدا على المنافقين بتوع النهاردة ، بتوع الجرايد الصفراء ، وبتوع البرامج اللي كل مرة يناقشوا فيها موضوع من المواضيع اللي تعد خطوط حمرا في دين الله عشان ينتهكوا حرمانات الله تعالى سبحانه وتعالى " **هُنَالِكَ ابْتُلِيَ الْمُؤْمِنُونَ وَزُلْزِلُوا زِلْزَالًا شَدِيدًا** \* " **وَإِذْ يَقُولُ الْمُنَافِقُونَ وَالَّذِينَ فِي قُلُوبِهِمْ مَرَضٌ مَا وَعَدَنَا اللَّهُ وَرَسُولُهُ إِلَّا غُرُورًا** " الأحزاب : ١١ : ١٢ أن محمد كان يحدثننا عن كنوز قصري وقبصر ، وأنا اليوم لا يأمن أحدنا أن يذهب إلى الغائط على نفسه ، الواحد مهواش عارف يروح الحمام وهو يقولنا قصري وقبصر " **مَا وَعَدَنَا اللَّهُ وَرَسُولُهُ إِلَّا غُرُورًا** " الأحزاب : ١٢

تخيل موقف النبي صلى الله عليه وسلم

"وَإِذْ قَالَتْ طَائِفَةٌ مِنْهُمْ يَا أَهْلَ يَثْرِبَ! الْأَحْزَابُ : ١٣ يثرب ؟ مش الرسول صلى الله عليه وسلم غير اسمها وبقي اسمها المدينة ؟ خلاص دي هي أيام والناس دي هتتزال ، نرجع للإسم القديم ، الحقد بدأ يطلع والحاجات الدفينة بدأت تطلع ، والإسم القديم دلالة علي أن خلاص بدأوا يستعدوا أن المسلمين هيقضي عليهم "يَا أَهْلَ يَثْرِبَ لَا مُقَامَ لَكُمْ فَارْجِعُوا وَيَسْتَأْذِنُ فَرِيقٌ مِنْهُمُ النَّبِيَّ" الأحزاب : ١٣

تخيل موقف النبي صلى الله عليه وسلم في اللحظة دي أيه ؟ أنا حاسس إن داعية قعد بيني دعوته بعمره بعمره بعمره والبنيان بيطلع ، وفجأة كل البنيان اللي قعد بينيه بعمره وبدمه بيقع قدام عنيه واحدة واحدة ، ١٠٠٠ لآ ، ٥٠٠ لآ ، ٢٠٠٠ لآ ، ٢٣٠٠ لآ ، ٢٥٠٠ البنيان قعد يتراجع يتراجع ، والرسول صلى الله عليه وسلم بعد ما كان حواليه الآف بقي كل اللي حواليه عشرات ! تخيلوا يا جماعة حاله النبي صلى الله عليه وسلم ساعتها كانت أيه ؟

"لَا مُقَامَ لَكُمْ فَارْجِعُوا وَيَسْتَأْذِنُ فَرِيقٌ مِنْهُمُ النَّبِيَّ يَقُولُونَ إِنَّ بُيُوتَنَا عَوْرَةٌ وَمَا هِيَ بِعَوْرَةٍ" الأحزاب : ١٤ الدنيا محتاجانا وشغلنا محتاجنا ، وولادنا محتاجينا ومراتنا محتاجنا ، ودراستنا محتاجلنا والدنيا والمصالح ، وأنت عارف الظروف ، الدين بيتقطع ! الدين بيتحارب ! أمريكا جايه علينا ، روسيا جايه علينا ، الدنيا جاية علينا وأنت تقولي الظروف ، سبحان ربي!!! "وَمَا هِيَ بِعَوْرَةٍ إِنْ يُرِيدُونَ إِلَّا فِرَارًا" الأحزاب : ١٣

محسن .. وغير محسن !!!

"وَلَوْ دُخِلَتْ عَلَيْهِمْ مِنْ أَقْطَارِهَا" لو المدينة اتدخلت من الأعداء "ثُمَّ سُلِّمُوا الْفِتْنَةَ" اكفروا "لَا تَوْهَا وَمَا تَلَبَّثُوا بِهَا إِلَّا يَسِيرًا" الأحزاب : ١٤ يعني أمريكا لما دخلت العراق ، ملاتش في كل شارع واحد يرضي يشتغل ليها جاسوس علي أخوانه المسلمين ؟ ملاقتش ؟! إسرائيل لما دخلت فلسطين ، ملاقتش في كل حارة واحد من المسلمين يرضي يشتغل جاسوس علي إخوانه المسلمين ؟! ملاقتش ؟! "لَا تَوْهَا وَمَا تَلَبَّثُوا بِهَا إِلَّا يَسِيرًا" الأحزاب : ١٤ مجتمع غير

محسن

عكس لما أمريكا راحت افغانستان ، لما رمت الأكل علي قرية من القرى وهم هيموتوا من الجوع و محاصرين ، ولعوا في الأكل عشان ميكلوش الأكل بتاع أمريكا ، شايفين يا جماعة ؟ مجتمع محسن عشان كده لو قعدوا ٥٠٠ سنة هناك ، مش هيعملوا حاجة ، ولو لقوا واحد يعاونهم هناك ، هيلاقوا ١٠٠ ألف واحد يقف في وشهم ، يبقى إذن يا جماعة بيظهر هنا المنافقون علي حقيقتهم ، وبيظهر الثبات علي حقيقته

إحنا كده ماشين صح

"وَلَمَّا رَأَى الْمُؤْمِنُونَ الْأَحْزَابَ قَالُوا هَذَا مَا وَعَدَنَا اللَّهُ وَرَسُولُهُ وَصَدَقَ اللَّهُ وَرَسُولُهُ وَمَا زَادَهُمْ إِلَّا إِيمَانًا وَتَسْلِيمًا" الأحزاب : ٢٢ بس إحنا النهاردة زاد دليل يقيني علي أننا علي الحق إزاي ؟ أنا بقولك روح الجامعة ، طيب أروح الجامعة مين ؟ من الشارع الفلاني ، خد بالك الشارع ده فيه محل سوبر ماركت اسمه كذا ، يبقى انت لما تمشي في الشارع وتلاقى السوبر ماركت ده ، تقول بس ده أنا إيه ؟ ده أنا ماشي صح ، يبقى دي معالم في الطريق إلى الله طريق الدين يا جماعة ، لما تلاقى أهل الكفر جايين مجتمعين إحنا ماشين صح ، إنما لما تلاقىهم سايبينك ، لآ ، يبقى فيه مشكلة عندنا في الطريق إلى الله سبحانه وتعالى وفي طريق الدعوة

"هَذَا مَا وَعَدَنَا اللَّهُ وَرَسُولُهُ وَصَدَقَ اللَّهُ وَرَسُولُهُ" الله أكبر إن الفتنة تزود يقينك ، إن الشهوات تزود إيمانك وثباتك إن الشبهات تزود يقينك في الله سبحانه وتعالى ، ده الإيمان الحق "وَمَا زَادَهُمْ إِلَّا إِيمَانًا وَتَسْلِيمًا" الأحزاب : ٢٢  
رجاء صدقوا

"مِنَ الْمُؤْمِنِينَ رِجَالٌ" الأحزاب : ٢٣ رجاله مش ذكور ، رجاله بحق وحقيقي "صَدَقُوا مَا عَاهَدُوا اللَّهَ عَلَيْهِ" الأحزاب : ٢٣ ما دام في ميثاق يبقى فيه صدق "فَمِنْهُمْ مَنْ قَضَىٰ نَحْبَهُ" الأحزاب : ٢٣ فيه واحد وهو في الطريق قتل زي مصعب كده - رضي الله عنه - الشاب الجميل الوسيم ، اللي العطر بتاعه فواح في كل حته ، زينة المجالس ، الشاب اللي كان كله بيحب يقعد معاه ويتكلم معاه ، لما مات الهدوم بتاعته مقطعة ، الثوب الوحيد اللي عنده ليغطي رجله يغطي راسه ، الرسول صلى الله عليه وسلم غطي بيه راسه ، وكفنوا رجله في نجيلة الأرض في الإذخر : نجيلة الأرض ! ياه من المؤمنين رجاله فعلا والله يا جماعة

"صَدَقُوا مَا عَاهَدُوا اللَّهَ عَلَيْهِ فَمِنْهُمْ مَنْ قَضَىٰ نَحْبَهُ وَمِنْهُمْ مَنْ يَنْتَظِرُ" الكلمة دي في غاية الخطورة ، الكلمة دي يا جماعة خطيرة جدا ، ينتظر أيه ؟ ينتظر أن يقضي نحبه ، يعني إيه ؟ يا جماعة النظر هو تقليب البصر في الشيء مع أعمال الفكر ، النظر يعني تنظر للشجرة دي ، تعد تبص لها كدة من النحيادي ومن النحيادي ، الانتظار يعني أيه ؟ الانتظار يعني أنا قاعد في البيت مستنيك ، أبص من الشباك هوا جه ولا لسه ؟ لأ ، طب الباب أنا سامع صوت علي السلم ، أما أروح أفتح الشراعة أشوف هو في جه ولا لسه ؟ أبص من العين السحرية ، لأ ، طب أما اتصل في التليفون أشوف هو أتأخر ليه ؟ يمكن يكون جي ، يمكن يكون ، ده الانتظار يا جماعة ، أنك أنت مشتاق لشيء ومستني أن هو هيجي ، وقاعد تدور هيجي مين ؟ ناس كان كل حلم حياتها الشهادة

**ينتظر !!!**

"وَمِنْهُمْ مَنْ يَنْتَظِرُ وَمَا بَدَّلُوا تَبْدِيلًا" الأحزاب : ٢٣ فضل علي العهد اللي قطعاه على نفسه أمام الله لأخر لحظة في حياته ، فضل علي الثبات في نصره دين الله لأخر لحظة في حياته ، فضل مع الله ومتبع لرسول الله ، وقائم علي منهج الله وحافظ لحدود الله ، وداعى إلى الله لأخر لحظه في حياته ، مين فينا يا جماعة حقق المقامين دول ؟  
مقام "وَمِنْهُمْ مَنْ يَنْتَظِرُ" إمتي يارب دمي هيتزل عشانك يارب ؟ إمتي يارب هموت شهيد في سبيلك ؟ يارب إمتي ؟ تخيلوا يا جماعة واحد مات علي سريريه ، وواحد مات في سبيل الله ، يوم ما يقبلوا ربنا ، ربنا هيستقبل مين إستقبال أشد حفاوة من الثاني ؟

**ثابت !!!**

تخيلوا طب المقام الثاني "وَمَا بَدَّلُوا تَبْدِيلًا" الأحزاب : ٢٣ إنك تفضل "وَمَا بَدَّلُوا تَبْدِيلًا" طب ما في أيام رخاء أنا ممكن أشتغل الأثنين عادي وميهمني ، وفي أيام شدة و في أيام حرب من أهل الباطل ، وفي أيام الأرض كلها هتجتمع عليك ، هتفضل متبدلش في الأثنين ؟ هتفضل في السراء والضراء ؟ هو ده البطولة اللي كان فيها الصحابة الأزمة تفاقمت يا جماعة والمنافقين قاعدين يرجعوا ، واللي في قلوبهم مرض قاعدين يرجعوا ، وسبحان ربي في عز الأزمة ، في عز حرب الدين ، في عز التشويه الإعلامي على الفضائيات بتاعة العالم كله ، في عز ما الإسلام صورته

مشوهة في العالم ، في عز ما هو محارب وهو مستضعف ، تلاقي ربنا بيجيب ناس يدخلوا في الإسلام ، تقول إزاي دول دخلوا في الإسلام في الوقت ده ؟!! في الوقت ده اللي غطفان خرجت ٦٠٠٠ رجل من رجالها يحاربوا رسول الله صلى الله عليه وسلم

### نعيم ابن مسعود والحيلة

ربنا يشرح صدر نعيم ابن مسعود الغطفاني اللي من غطفان للإسلام ، ويروح لرسول الله صلى الله عليه وسلم ، أنا أسلمت يارسول الله ، ومحدث يعرف إن أنا أسلمت ، نعيم ابن مسعود : الرجل ذو الوجهه والمركز من غطفان ، اللي بتحارب النبي صلى الله عليه وسلم مين اللي يشك فيه ؟ ومحدث يعرف عنه حاجة ، يروح لليهود خدوا بالكوا ، إيه فيه إيه ؟ قريش جاية تحارب النبي ، قريش بينها وبين النبي صلى الله عليه وسلم مسافات ، ممكن في أي لحظة يمشوا ويسبيوكوا أنتوا ، طب وبعدين ؟ عشان تضمنوا أنهم ميسبيوكوش اطلبوا من قريش رهائن عشان يفضلوا معاكم عشان قريش متنازلش عنكم أبدا ، أيوه صح ده أنت كلامك مضبوط ، ويقوم رايح لقريش خدوا بالكوا اليهود ندمت إن هي عاهدتكم وكسرت العهد بتاعها مع محمد ، وهيطلبوا منكوا رجالة علشان يسلموهم ل محمد يقتلهم عشان يصالحوا بيهم محمد ، فالأثنين وقعوا في بعض ، اتفك التحالف بتاعهم ، فكان من ضمن الأسباب الخطيرة اللي كانت لصالح المسلمين بفضل الله سبحانه وتعالى

### خاتمة عجيبة !!!

ثم كانت الخاتمة العجيبة يا جماعة للغزو ، الخاتمة العجيبة جدا، شوف معايا :

١. "وَرَدَّ اللَّهُ الَّذِينَ كَفَرُوا بِغَيْظِهِمْ لَمْ يَنَالُوا خَيْرًا" الأحزاب : ٢٥

عايزين ربنا يرد أمريكا عننا كدة ؟ بس لما نبقي رجاله زي المؤمنين اللي في سورة الأحزاب "وَرَدَّ اللَّهُ الَّذِينَ كَفَرُوا

بِغَيْظِهِمْ لَمْ يَنَالُوا خَيْرًا وَكَفَى اللَّهُ الْمُؤْمِنِينَ الْقِتَالَ" وَكَانَ اللَّهُ قَوِيًّا عَزِيزًا" الأحزاب : ٢٥

٢. "وَأَنْزَلَ الَّذِينَ ظَاهَرُوهُمْ مِنْ أَهْلِ الْكِتَابِ مِنْ صَاصِيهِمْ وَقَذَفَ فِي قُلُوبِهِمُ الرُّعْبَ فَرِيقًا تَقْتُلُونَ وَتَأْسِرُونَ فَرِيقًا"

الأحزاب : ٢٦ بنو قريظة أول ما الأحزاب مشوا الرسول صلى الله عليه وسلم قال: " لا يصلين أحد العصر إلا في

بني قريظة " أخرجه الشيخان والسياق للبخاري ، بني قريظة اللي كانوا هينسفوا الإسلام في لحظة

ماهي دي مصيبه اليهود يا جماعة إن ممكن في الحيل بتاعته يجمع عليك الأرض كلها " لا يصلين أحد العصر إلا في

بني قريظة " أخرجه الشيخان والسياق للبخاري انطلق علي بني قريظة ، حصار ٢٥ يوم ، ثم تقتيل كل الرجال

بتوعهم ليه ؟ لأن كان كل المسلمين هيقتلوا بسبب اللي هم عملوه ، فهذه جريمة لا يوجد عليها عقاب إلا الإعدام

لمثل هذه الفتنه الخائنة اللي كانت تهلك دين الله سبحانه وتعالى في الأرض " يُرِيدُونَ أَنْ يُطْفِئُوا نُورَ اللَّهِ بِأَفْوَاهِهِمْ

وَيَأْبَى اللَّهُ" التوبة : ٣٢ "وَأَنْزَلَ الَّذِينَ ظَاهَرُوهُمْ مِنْ أَهْلِ الْكِتَابِ مِنْ صَاصِيهِمْ وَقَذَفَ فِي قُلُوبِهِمُ الرُّعْبَ فَرِيقًا

تَقْتُلُونَ وَتَأْسِرُونَ فَرِيقًا" الأحزاب : ٢٦ فين الرعب دلوقتي يارب ؟ فين الرعب ده إحنا اللي مرعوبين منهم يارب

ماهو مفيش إيمان " وَقَذَفَ فِي قُلُوبِهِمُ الرُّعْبَ فَرِيقًا تَقْتُلُونَ وَتَأْسِرُونَ فَرِيقًا" الأحزاب : ٢٦

٣. "وَأَوْرَثَكُمْ أَرْضَهُمْ وَدِيَارَهُمْ وَأَمْوَالَهُمْ وَأَرْضًا لَمْ تَطَّوُّهَا" الأحزاب : ٢٧ ده كمان بشري بحاجات لسة جاية

بمناسبه الصبر اللي الناس صبرته في هذه الغزوة "وَأَرْضًا لَمْ تَطَّوُّهَا" الأحزاب : ٢٧ ياه شايفين يا جماعة ؟ شايفين



الغزوه ؟ المنظر ده كله أنتهي علي إيه ؟ لأن أحنا كنا مع الله سبحانه وتعالى ، سورة الأحزاب سورة مدنية كل اللي قبلها مكى ، كل اللي بعدها مكى ، لما مدنية تيجي وسط هذا الشوط المكى يبقى المقصود الأساسي أن التكاليف بتاعة السورة دي تكاليف صعبة ولازم تطبق ، فلازم تشحن إيماننا كويس أوي قبل ما تدخلها عشان لما تدخل السورة دي يحصل إيه ؟ تقدر تطبق التكاليف بتاعتها

اتكلمنا قبل كده في سورة النساء عن الخماسية فاكريتها ؟ فاكرين لما قلنا أن سيدنا عمر قال " **تعلموا النساء والأحزاب والنور**" إشعنا الثلاثة سور ؟ ده من فقه سيدنا عمر في القرآن ، الثلاثه يا جماعة بيركزوا علي المنافقين والثلاثة بيتكلموا عن الخماسية ، فاكرين الخماسية بتاع سورة النساء لما قلنا وأنتوا بتقرأوا سورة النساء هتلاقوها بتكلم عن خمس حجج ، مرة دي ومرة دي ومرة دي ورا بعض عن اليهود

### اليهود والإفساد

آيات ذكر اليهود والمنافقين ، والطاعة والإتباع لرسول الله صلى الله عليه وسلم ، والقتال والجهاد ، والمرأة والأسرة ، قلنا إيه العلاقة بين دول وبين دول ؟ إن الشيطان بيفسد المجتمع الإسلامي من خلال استشراف المرأة لما تخرج وإفساد الأسرة ، ويقرب أوي الشيطان - الإبلis الكبير - الشيطان اللي يعرف يفرق بين المرء وزوجته ، اليهود زى الشيطان ، اليهود بيهدموا المجتمع الإسلامي من خلال تحرير المرأة أو التخريب بالمرأة ، ومن خلال هدم الأسرة ، طيب اليهود أذكيه ذي الفيرس ، بيحي من بره يحقن السم بتاعه في الخلية ويجندوها ليه ، **يقوموا اليهود بجوا من بره يحقنوا السم في المنافقين ، ويجندوا المنافقين جوه البلد عشان يفسدوا** ، يعني اليهود مايجوش إنما يسخروا لك مجلة ذي الدستور ، حتي لو بتوع الدستور مش وخدين بالهم ، يسخروا مجلات زي المجلات الصفراء بحيث إنما تقدم في دين الله سبحانه وتعالى ، يبقى آدي اليهود واقفين من بره بيحقنوا السم في المنافقين

### المنافقين والهدم !!!

المنافقين بيدأو يركزوا علي هدم الأسرة وهدم المرأة وإفساد المرأة ، يحصل إيه ؟ المرأة مش هترى رجالة ، والمرأة هتفسد الشباب اللي موجودين في جيلها ، دمرنا ٣ أجيال علي الأقل ، مفيش طاعة ولا أتباع لرسول الله صلى الله عليه وسلم ، طيب اخرجوا قاتلوا مفيش قتال ، القضية دي لازم تتقطع من أولها ، يبقى أذن يا جماعة دي الخماسية ، فين الخماسية دي في سورة الأحزاب ؟ اليهود " **وَأَنْزَلَ الَّذِينَ ظَاهَرُوهُمْ مِنْ أَهْلِ الْكِتَابِ مِنْ صَيَاصِيهِمْ**" ده دول اللي كانوا هيصيعوا الدنيا كلها لما أفتح الثغر الجنوبي بسببهم ، طيب المنافقين " **يَا أَيُّهَا النَّبِيُّ اتَّقِ اللَّهَ وَلَا تُطِعِ الْكَافِرِينَ وَالْمُنَافِقِينَ إِنَّ اللَّهَ كَانَ عَلِيمًا حَكِيمًا**" الأحزاب : ١

الوقتي اليهود يا جماعة خلاص ، المدينة عدت خالية من اليهود تماما ، بس بعد ما ربوا جيل من المنافقين ، فعلا ربوا أبالسة ، فالمنافقين بدأوا يلعبوا في هذه الفترة اللي هي خمسة هجرية دور خطير جدا في إفساد المجتمع تخيلوا جيش ٣٠٠٠ يروح ٢٧٠٠ منه ، تخيلوا يعني أيه يا جماعة ؟ أنتوا متصورين قوة المنافقين في المجتمع كان شكلها إيه ؟ بقوا قوة منظمة مرتبة بتخطط ، فكان لازم مواجهتها بكل عنف في هذه المرحلة ، بعد ما تم بفضل الله القضاء علي أول عقبه ثماني وهي عقبه مين ؟ المشركين ، كان الرسول في وشه المشركين والمنافقين و اليهود والنصارى كل دول قدامه ، بعد الأحزاب إنتهت قضية المشركين خلاص " **الآن نغزوهم ولا يغزونا**" صحيح الجامع

بعد قضية المشركين بقت كل الطاقات محشودة من أجل مواجهة هؤلاء المنافقين ، طيب بالنسبة للطاعة والإتباع سورة الأحزاب لو أنت عايز أكثر فكرة بتربط ما بين أياها كلها

**تعظيم رسول الله صلى الله عليه وسلم**

لو أنت عايز أكثر فكرة بتربط ما بين أجزاءها إزاي ؟ من أول السورة قول الله سبحانه وتعالى : **"النَّبِيُّ أَوْلَىٰ بِالْمُؤْمِنِينَ مِنْ أَنفُسِهِمْ"** الأحزاب : ٦ أولي بيك منك ، تحبه أكثر ما تحب نفسك ، تخاف عليه أكثر ما تخاف علي نفسك ، تعظمه أكثر مما تعظم نفسك ، تسعى علي صيانة حرمانه والدفاع عن سنته أكثر ما بتصون حرمانك وتدافع عن ولادك وأسرتك ودينك **"النَّبِيُّ أَوْلَىٰ بِالْمُؤْمِنِينَ مِنْ أَنفُسِهِمْ"** الأحزاب : ٦ بعد كدة بعدها على طول **"لَقَدْ كَانَ لَكُمْ فِي رَسُولِ اللَّهِ أُسْوَةٌ حَسَنَةٌ لِّمَن كَانَ يَرْجُو اللَّهَ وَالْيَوْمَ الْآخِرَ وَذَكَرَ اللَّهَ كَثِيرًا"** الأحزاب : ٢١ حاجة جميلة أوي يا جماعة ، إن بعد الموقف العصيب ده ، القائد يخرج نموذج قدام الأتباع بتوعه ، يعني إنك تفضل نموذج ، يعني أنت راجل بتدعوا شلة بتاعتك مثلا ، حصل مشكلة في الإمتحانات ، أما أنت تجزع وتقع يبقى أنت خلاص ضربت النموذج قدامهم ، إنك أنت في عز الأزمة برده تفضل نموذج

**قدوة رغم الأزمة !!!**

الرسول صلى الله عليه وسلم في عز الأزمة بردوا فضل نموذج ، برده فضل أسوة يتبع بيه ، وخذوا بالكوا يا جماعة الرسول بيقول اتبعوا ، اتبعوا إيه يارب ؟ ده أحنا محاصرين ، ده أحنا مهددين ، ده أحنا هنتسلف ، إتباع الرسول ؟ اللي ضيعكوا عدم أتباع الرسول ، اوعوا تغلطوا أي غلطه في الإِتباع ، يبقى لما ربنا يتكلم في غزوة الأحزاب عن أتباع النبي ، معناه إن أتباع النبي دي قضية مصيرية بالنسبة لنا ، قضية حياة أو موت ، وجود أو عدم ، نصر أو هزيمة بالنسبة لنا

**لستن كأحد من النساء**

**"يَا نِسَاءَ النَّبِيِّ لَسْتُنَّ كَأَحَدٍ مِنَ النِّسَاءِ"** الأحزاب : ٣٢ يبقى أي حد هينتمي للنبي صلى الله عليه وسلم ويقترن بيه لا يعامل زى أحد من البشر ، ويقاس عليها مع الفارق نساء الدعاة ، يا نساء الدعاة لستن كأحد من النساء ، لازم تستحملي أكثر ما غيرك بيتحمل ، وتوقفي مع جوزك أكثر ما غيرك بيقف ، ولازم تضحي بشهوات الدنيا أكثر ما غيرك بيضحي

**ليبيك رسول الله**

**"وَمَا كَانَ لِمُؤْمِنٍ وَلَا مُؤْمِنَةٍ إِذَا قَضَىٰ اللَّهُ وَرَسُولُهُ أَمْرًا أَنْ يَكُونَ لَهُمُ الْخِيَرَةُ مِنْ أَمْرِهِمْ"** الأحزاب : ٣٦ إذا الرسول اتكلم خلاص خلصت ، محدش يقول أقنعي ومش أقنعي ومنتناقش ، الرسول صلى الله عليه وسلم قال ، قال رسول الله لي الله عليه وسلم الكلمه دي لما نسمعها من أي إمام على المنبر لازم قلبك يترعش ، قال رسول الله على طول كلك آذان صاغية ، لبيك رسول الله صلى الله عليه وسلم ، لبيك وسعديك يا رسول الله صلى الله عليه وسلم

النبي صلى الله عليه وسلم السراج المنير

بعد كدة شوفوا " يَا أَيُّهَا النَّبِيُّ إِنَّا أَرْسَلْنَاكَ شَاهِدًا وَمُبَشِّرًا وَنَذِيرًا \* وَدَاعِيًا إِلَى اللَّهِ بِإِذْنِهِ وَسِرَاجًا مُنِيرًا "

الأحزاب : ٤٥ : ٤٦ ربنا وصف الشمس في القرآن بأنها سراج ، ووصف القمر في القرآن بأنه منير ، وحينما

وصف رسول الله صلى الله عليه وسلم جمع له ما وصف به الشمس والقمر ، وصفه بأنه السراج المنير

يعني أيه ؟ يعني رسول الله صلى الله عليه وسلم دا ده شمس النهار ، دا ده قمر الليل ، ده الرسول صلى الله عليه

وسلم دا اللي نوره مغلطنا الأربعة وعشرين ساعة ، عايزين يا جماعة نبقي كدة مع الناس ، نبقي نور بيغطي للناس

كل خطوه في حياتها ، وعايزين نفهم خطورة سنة رسول الله صلى الله عليه وسلم أنها بتنور لنا كل حاجة في حياتنا

دي سنة رسول الله صلى الله عليه وسلم

وفي آخر السورة " يَا أَيُّهَا الَّذِينَ آمَنُوا لَا تَكُونُوا كَالَّذِينَ آذَوْا مُوسَىٰ فَبَرَّاهُ اللَّهُ مِمَّا قَالُوا ۚ وَكَانَ عِنْدَ اللَّهِ وَجِيهًا "

الأحزاب : ٤٦ اوعوا تأذوا رسول الله صلى الله عليه وسلم زي ما أؤذي موسى ، زي موقف زيد كدة ، الرسول

عليه الصلاة والسلام ده أمر من ربنا نزل له ، يعني يا جماعة ده الواحد وهو شغال في الدعوة ، أو رايح درس لو

شاف ملكة جمال العالم قدامه والله ما هيبص لها ، هو اللي بيشتغل في الدعوة هوا فيه دماغ أصلا للدنيا ، يبقى إذا لما

يتزل تشريع من الله سبحانه وتعالى إن الرسول صلى الله عليه وسلم يتزوج من زينب بنت جحش رضي الله عنها ،

دا ده أصلا حاجة ربنا عاتب النبي صلى الله عليه وسلم إزاي يعني نفسه شالت من هذا الموقف ؟ النبي نفسه عليه

الصلاه والسلام ربنا عاتبه

قال له : " الَّذِينَ يُلْلِغُونَ رِسَالَاتِ اللَّهِ وَيَخْشَوْنَهُ وَلَا يَخْشَوْنَ أَحَدًا إِلَّا اللَّهَ ۚ وَكَفَىٰ بِاللَّهِ حَسِيبًا " الأحزاب : ٣٩

" يَا أَيُّهَا الَّذِينَ آمَنُوا لَا تَكُونُوا كَالَّذِينَ آذَوْا مُوسَىٰ فَبَرَّاهُ اللَّهُ مِمَّا قَالُوا ۚ وَكَانَ عِنْدَ اللَّهِ وَجِيهًا " الأحزاب : ٤٦

" إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ آمَنُوا صَلُّوا عَلَيْهِ وَسَلِّمُوا تَسْلِيمًا " الأحزاب : ٥٦ دي من ضمن

الآيات اللي في السورة

الأدب مع رسول الله صلى الله عليه وسلم

ومن ضمن الآيات اللي في السورة يا جماعة قول الله سبحانه وتعالى : " يَا أَيُّهَا الَّذِينَ آمَنُوا لَا تَدْخُلُوا بُيُوتَ النَّبِيِّ إِلَّا

أَنْ يُؤْذَنَ لَكُمْ إِلَىٰ طَعَامٍ غَيْرٍ نَاطِرِينَ إِنَاهُ وَلَكِنْ إِذَا دُعِيتُمْ فَادْخُلُوا فَإِذَا طَعِمْتُمْ فَانْتَشِرُوا " الأحزاب : ٥٣ يعني لما

الرسول صلى الله عليه وسلم يدعوكم لوليمة يعني " لَا تَدْخُلُوا بُيُوتَ النَّبِيِّ إِلَّا " الأحزاب : ٥٣ إلا أنكم أنتم إيه ؟

تدعو إلى طعام " غَيْرٍ نَاطِرِينَ إِنَاهُ " يعني متدخلش غير إذا دعيت ، وإذا دعيت إلى طعام تدخل لما الطعام ينضج

وأول ما الطعام ينضج " وَلَا مُسْتَأْنِسِينَ لِحَدِيثٍ " تقوم خارج على طول " إِنَّ ذَلِكُمْ كَانَ يُؤْذِي النَّبِيَّ فَيَسْتَحْيِي مِنْكُمْ ۚ

وَاللَّهُ لَا يَسْتَحْيِي مِنَ الْحَقِّ " الأحزاب : ٥٣ يبقى السورة كلها دفاع من ربنا عن النبي صلى الله عليه وسلم وتعظيم

من ربنا للنبي صلى الله عليه وسلم ، وربنا بيقولنا أد إيه مقام النبي عظيم ، وأد إيه لازم نتبع رسول الله صلى الله

عليه وسلم ونطيع رسول الله صلى الله عليه وسلم ، يبقى ده النقطة الثالثة في الخماسية



## دور المرأة الخطير ... والعلاقة بين الرجل والمرأة

النقطة الرابعة يا جماعة المرأة ، دور المرأة الخطير ، السورة تقولك أد إليه لازم العلاقة بين الرجل والمرأة تنظم ، لازم تنظم إزاي ؟ ده ربنا يقول نساء النبي ، نساء النبي مش البنات بتوع اليومين دول ، ويقول الصحابة مش الشباب بتوع اليومين دول ، يقول الله سبحانه وتعالى "وَإِذَا سَأَلْتُمُوهُنَّ مَتَاعًا" الأحزاب : ٥٣ يعني حاجة ضرورية مش كشكول المحاضرات "فَاسْأَلُوهُنَّ مِنْ وَرَاءِ حِجَابٍ ذَلِكُمْ أَطْهَرُ لِقُلُوبِكُمْ وَقُلُوبِهِنَّ" الأحزاب : ٥٣ "يعني أنتي قلبك أنصف من قلب نساء النبي صلى الله عليه وسلم ؟ وأنت قلبك أنصف من قلب صحابه النبي عليه الصلاة والسلام ؟ والحاجات اللي أحنا محتاجنها ؟ الاختلاط يا جماعة ، لازم يبقى فيه ضوابط في مسألة الاختلاط

### الحجاب،،،،،باب

"وَقَرْنَ فِي بُيُوتِكُنَّ وَلَا تَبَرَّجْنَ تَبَرُّجَ الْجَاهِلِيَّةِ الْأُولَى" الأحزاب : ٣٣ ربنا وصف السفور ده بأنه جاهلية ، نوع من أنواع الجاهلية ، المكياج ده جاهلية ، كشف الشعر ده جاهلية ، ده انتكاس شديد عن دين الله سبحانه وتعالى ونزلت آية الحجاب في سورة الأحزاب : "يَا أَيُّهَا النَّبِيُّ قُلْ لِّأَزْوَاجِكَ وَبَنَاتِكَ وَنِسَاءِ الْمُؤْمِنِينَ يُدْنِينَ عَلَيْهِنَّ مِنْ جَلَابِيبِهِنَّ ذَلِكُمْ أَذْنَى أَنْ يُعْرِفْنَ فَلَا يُؤْذِينَ" وَكَانَ اللَّهُ غَفُورًا رَحِيمًا" الأحزاب : ٥٩ وأزواجك قبل بناتك ، ليه ؟ الأم لو فعلا صالحه البنت هتطلع صالحة ، يبقى إذا خطورة العلاقة بين الرجل والمرأة في المجتمع

### المرأة... داعية... طالبة علم ... مجاهدة

يا جماعة سورة الأحزاب أول سورة في القرآن تقول للمرأة إنت مطلوب منك تبقي داعية ، أنت مطلوب منك تبقي طالبة علم ، أنت مطلوب منك تبقي مجاهدة زيك زي الرجل ، إنت زيك زي الرجل واقفة علي نفس الثغور اللي هو واقف عليها

"وَاذْكُرْنَ مَا يُتْلَىٰ فِي بُيُوتِكُنَّ مِنْ آيَاتِ اللَّهِ وَالْحِكْمَةِ" الأحزاب : ٣٤ أطلي علم ، أطلي علم بالضوابط بتاعته ، أول مره أسمع القرآن يقول للمرأة أطلي علم أيوه ، لأن الحرب ضد النفاق ، النفاق بيدمر المرأة ، النفاق بيركز علي المرأة ، مينفعش نص المجتمع يغيب من هذه المعركة ، لازم تبقي زيك زي الرجل جنبه في مواجهة هذه المعركة بالظبط ، ربنا يقول "إِنَّ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ" الأحزاب : ٣٥ "تفصيل : المرأة جنب الرجل في كل ثغرة من ثغور الدين "وَالْقَانِتِينَ وَالْقَانِتَاتِ وَالصَّادِقِينَ وَالصَّادِقَاتِ" الصدق يعني لازم تعملي لدين الله ، الصدق يعني لازم تدعي إلي الله ، الصدق إنك تجاهدي في المعركة تجاهدي في المعركة

"وَالصَّابِرِينَ وَالصَّابِرَاتِ وَالْخَاشِعِينَ وَالْخَاشِعَاتِ وَالْمُتَصَدِّقِينَ وَالْمُتَصَدِّقَاتِ وَالصَّائِمِينَ وَالصَّائِمَاتِ وَالْحَافِظِينَ فُرُوجَهُمْ وَالْحَافِظَاتِ وَالذَّاكِرِينَ اللَّهَ كَثِيرًا وَالذَّاكِرَاتِ" الأحزاب : ٣٥ وما بين الصائمين وما بين الذاكرين "وَالْحَافِظِينَ فُرُوجَهُمْ وَالْحَافِظَاتِ" ربنا حط حفظ الفرج ما بين الصوم والذكر ، كأن أكثر حاجتين الشاب يستعين بهم علي الشهوة : الصيام وكثرة ذكر الله سبحانه وتعالى "أَعَدَّ اللَّهُ لَهُمْ مَغْفِرَةً وَأَجْرًا عَظِيمًا" الأحزاب : ٣٥ يبقى دور المرأة الخطير "وَمَنْ يَقْنُتْ مِنْكُنَّ لِلَّهِ وَرَسُولِهِ" الأحزاب : ٣١ مش "ومن تقنت" "وَمَنْ يَقْنُتْ" أنت زيك زي الرجل لازم تقفي علي نفس الثغور اللي واقف عليها الرجل

**مينفعش تبقى بوشين !!!!**

حتى من أول السورة يا جماعة شوفوا ربنا يقول "مَا جَعَلَ اللَّهُ لِرَجُلٍ مِنْ قَلْبَيْنِ فِي جَوْفِهِ" الأحزاب : ٤ ده دول المنافقين ، مينفعش تبقى معانا وعلينا، مينفعش تبقى بوشين ، ولا تبقى بقلبين  
 الآيه اللي بعدها : "وَمَا جَعَلَ أَزْوَاجَكُمُ اللَّائِي تُظَاهِرُونَ مِنْهُنَّ أُمَّهَاتِكُمْ" يبقى إيه اللي ربط النفاق بقضية الظهار المتعلقة بالمرأة ؟ الأثنين نفس القضية ، النفاق بيستثمر أساسا المرأة ، لما ربنا يربط الأثنين ببعض يبقى ربنا بيعرفك بخطورة النفاق وعلاقتها بالمرأة

**الدين أمانة**

آخر السورة خالص لما ربنا يقول "إِنَّا عَرَضْنَا الْأَمَانَةَ" الأحزاب : ٧٢ في أمانة كلنا شيلنها ، في مسئوليها كلنا شيلنها الدين ده أمانة ، تكاليفه أمانة ، نصرته أمانة ، الدفاع عنه أمانة ، نشره أمانة "إِنَّا عَرَضْنَا الْأَمَانَةَ عَلَى السَّمَاوَاتِ وَالْأَرْضِ وَالْجِبَالِ فَأَبَيْنَ أَنْ يَحْمِلْنَهَا وَأَشْفَقْنَ مِنْهَا وَحَمَلَهَا الْإِنْسَانُ إِنَّهُ كَانَ ظَلُومًا جَهُولًا"  
 الأحزاب : ٧٢

**المنافقات !!!**

شوف الآية اللي بعدها : "لِيُعَذِّبَ اللَّهُ الْمُنَافِقِينَ وَالْمُنَافِقَاتِ وَالْمُشْرِكِينَ وَالْمُشْرِكَاتِ" الأحزاب : ٧٣  
 ذكر المرأة في الشرك والنفاق ، دلالة أن المرأة الكافرة والمنافقة ليها فاعلية في هدم الإسلام ، وفعلا معظم تيار النفاق مش رجالة ستات ، معظم المنافقات والتيار العلماني في البلد ستات مهماش رجالة ، بس تلاقي ست ست !  
 تعملك برنامج كل أسبوع تسمم بيه أمخاخ الناس ، تعملك جريدة تسمم بيها أمخاخ الناس ، تألف كتب تسمم بيها أمخاخ الناس ، تلاقي معظم التيار العلماني فعلا نساء يا جماعة "لِيُعَذِّبَ اللَّهُ الْمُنَافِقِينَ وَالْمُنَافِقَاتِ وَالْمُشْرِكِينَ وَالْمُشْرِكَاتِ وَيَتُوبَ اللَّهُ عَلَى الْمُؤْمِنِينَ وَالْمُؤْمِنَاتِ غَفُورًا" الأحزاب : ٧٣

بعد آية الأمانة ، كأن الأمانة مش علي الرجالة لواحدهم ، دي علي الرجالة وعلى الستات كمان ، يبقى إذا ربنا بيحمل المرأة دور خطير جدا في هذه السورة ، لأن في الوقت اللي بيشد فيه حرب النفاق زي الوقتي لازم كل واحد يشوف مصادره ، لازم كل واحد يعملوا حاجة ، يبقى ذكرت اليهود ، ذكرت المنافقين ، ذكرت القتال طبعاً غزوة الأحزاب يعني اللي السورة بدأ بيها ، ذكرت المرأة والأسرة بالكلام اللي أحنا إتكلمنا عنه في المرأة والأسرة ، يعني إيه ؟ يعني إحنا دلوقتى لو عايزين نستخلص من سورة الأحزاب إيه اللي المفروض نعمله ؟  
 إيه اللي المفروض نعمله ؟

١. تعظيم الرموز... تعظيم رسول الله وتعظيم الدعاة : هما دلوقتى بيحاولوا يعملوا إيه ؟ هو فلان الفلاني ركب عربيه منين ؟ وفلان ؟ إمال فلان الفلاني هياكل منين يا جماعة ؟ فلان الفلاني ده الشريط بتاعه بيسمعه علي النت نص مليون بني آدم ، ويبشترى الشريط يجي ربع مليون بني آدم ، ويبشترى الشريط يجي ميت ألف بني آدم ، إنتوا عايزين بعد الفتح اللي ربنا فتحه علي ايديه ده يفضا حاجة غير الدين إزاي ؟ يعني هو كلوا هيشغل في الدنيا ؟  
 طيب مين اللي هيشغل للدين ؟ ومين اللي هيقوم بدور أبو بكر ودور عمر رضي الله عنهم ؟

يعني الصحابة تكاملوا مع بعض يا جماعة ، مين اللي هيشيل الدين ؟ أنتوا عايزين واحد زي ده يعمل إيه ؟ ماهو لازم يتفرغ للدعوة ، طيب ولما يتفرغ للدعوة هياكل ظلط ويأكل ولاده طوب ، ويقعد يجيب شوية طين كدة و هيجيب منين ؟ يبقى إذن مسألة إن داعية فقير وكلهم أصلهم فقراء جدا ، مسألة أن داعية فقير يأخذ مال عشان يتفرغ للدعوة ، أيوة يا جماعة ، أيوة طبعاً يأخذ مال علشان يتفرغ للدعوة ، إيه القضية ؟ إحنا بتتكلم هنا في دروس التفسير كتير جدا علي مسأله إن إحنا مناخدش أجر علي الدعوة ، ولكن إفرض فعلا في لحظة من اللحظات عجزت ، المهام الدعوية اللي ملقاه علي عاتقك بقت فوق طاقتك ، ماعدش عندك ثانية ، زي الدعاة ربنا يبارك فيهم معدتش عندهم لحظة خلاص ، هتعمل إيه في هذه اللحظة ؟ إن كان ربنا خلاص ماغننا كشي تأخذ علي قدر ما تحتاجه يبقى إذا الدفاع عن الرموز ، لأن هدم الرموز ده هو أكثر حاجه بيحاولوا يعملوها في المجتمع ، هدم الرموز يستغلوا حادثة ذي حادثة زيد وزينب ويبدأوا يشتغلوا "يَا أَيُّهَا الَّذِينَ آمَنُوا لَا تَكُونُوا كَالَّذِينَ آذَوْا مُوسَى" الأحزاب : ٤٦

الحاجه الثانية يا جماعة اللي لازم نعملها في هذا الوقت ، مسألة يعني لما ربنا سبحانه وتعالى يكلمك عن المنافقين شوف بيكلم عن المنافقين إزاي في السورة ؟ اوعى تخاف منهم ، اوعى تتعامل معاهم بمواده

يعني ربنا خلانا في القرآن نتعامل في القرآن ، مع اليهود أحيانا بسياسة ، مع النصارى بسياسة ، أيوة سياسة ليها دوافع كتير جدا ، ولكن مع المنافقين في المرحلة دي مافيش سياسة ، فاكرين شريط الشيخ وجدي غنيم لما نزل شريط في الرد علي ماسيروا فاكرين ؟ أعتقد كتير جدا سمعوه ، هجوم ، هو ده الأسلوب اللي ينفع مع الناس دي المهجوم ليه ؟ لأنهم أصلا مرعوبين منك ، لا ينفع معهم إلا الأسلوب الهجومي ، شوف ربنا يقول للرسول

## ٢. عدم الخوف أثناء الحرب مع هؤلاء المنافقين

"يَا أَيُّهَا النَّبِيُّ" الأحزاب : ١ من أول السورة على طول "اتَّقِ اللَّهَ" الأحزاب : ١ "اتَّقِ اللَّهَ" وَلَا تُطِعِ الْكَافِرِينَ وَالْمُنَافِقِينَ" الأحزاب : ١ لا تخاف منهم وتسمع كلامهم في حاجة لأنك خايف منهم "إِنَّ اللَّهَ كَانَ عَلِيمًا حَكِيمًا" الأحزاب : ١ وفي آخر المقدمة "وَتَوَكَّلْ عَلَى اللَّهِ وَكَفَى بِاللَّهِ وَكِيلًا" الأحزاب : ٣ وربنا في وسط السورة يقول للنبي "الَّذِينَ يَبْلُغُونَ رِسَالَاتِ اللَّهِ وَيَخْشَوْنَهُ وَلَا يَخْشَوْنَ أَحَدًا إِلَّا اللَّهَ وَكَفَى بِاللَّهِ حَسِيبًا" الأحزاب : ٣٩ يبلغون إيه ؟ مش رسائل "رِسَالَاتٍ" جمع مؤنث سالم ، الجمع السالم بيفيد إيه يا جماعة ؟ إن كل مفرد من مفردات هذا الجمع قائم متكامل يعني إيه ؟ يعني كل كلمة من كلمات ربنا اتبلغت تمام التمام

أنا ممكن مثلا ادتني ١٠٠ جواب ، قمت رايح للمكان اللي أنا هبلغه ادهتهم ال ١٠٠ علي بعض كدة ، يبقى أنا كده بلغت رسائل ، إنما جواب جواب أطلعه وأطمئن أن هوا موجود وسليم و تمام وأوديه بأيدي ، أقوم مطلع الثاني وأوديه بأيدي يبقى كده الرسائل ، رسالة رسالة أتبلغت علي أكمل وجه ، ولم يختم أي رسالة ولم يقصر في الجهد المبذول أو المطلوب لتبليغ أي رسالة "الَّذِينَ يَبْلُغُونَ رِسَالَاتِ اللَّهِ وَيَخْشَوْنَهُ وَلَا يَخْشَوْنَ أَحَدًا إِلَّا اللَّهَ وَكَفَى بِاللَّهِ حَسِيبًا" الأحزاب : ٣٩ يبقى الحاجة اللي بعد كدة عدم الخوف أثناء الحرب مع هؤلاء المنافقين

## ٣ . الحاجه الثالثة خطورة دور المرأة

طبعاً يجب أن المرأة تلعب دور خطير جدا ، يا جماعة السورة بتقول للمرأة لازم تبقي طالبة علم ، لازم تبقي داعية لازم تبقي إنسانة مؤمنة عابدة ، مش قضية المرأة الوحيدة إن هي "وَقَرْنَ فِي بُيُوتِكُنَّ" الأحزاب : ٣٣ ممنعتش إن ربنا

يقولها أطلبي علم ، ممنعتش إن ربنا يقولها خليكى صادقة ، يعني أشتغلي في الدعوة ، الصدق ، هو في واحد صادق هيشوف الدين بيحصله اللي بيحصله ده وميشتغلش في الدعوة إلى الله ؟!! ومينصرش دين الله سبحانه و تعالى ؟!! وإلا إيه الصدق هنا ؟ وإيه الصبر أصلا اللي ربنا طلب إنما تصبر عليه ؟ يبقى اذا ياجماعة ربنا حط علي أكتاف المرأة في هذه السورة مسئوليه عظيمه علي أنها نصف المجتمع ونصف الحرب ، و الرد علي هؤلاء المنافقين

الحاجة الأخيرة اللي إحنا هنتكلم عنها في الحرب عليهم في هذه السورة ، شوفوا ربنا بعد غزوة الأحزاب يقول : **"وَأَنْزَلَ الَّذِينَ ظَاهَرُوهُمْ مِنْ أَهْلِ الْكِتَابِ مِنْ صَيَاصِيهِمْ وَقَذَفَ فِي قُلُوبِهِمُ الرُّعْبَ فَرِيقًا تَقْتُلُونَ وَتَأْسِرُونَ فَرِيقًا \* وَأَوْرَثَكُمْ أَرْضَهُمْ وَدِيَارَهُمْ وَأَمْوَالَهُمْ وَأَرْضًا لَمْ تَطَّوُّوهاً وَكَانَ اللَّهُ عَلَىٰ كُلِّ شَيْءٍ قَدِيرًا"** الأحزاب ٢٦ : ٢٧ الآية اللي بعدها : **"يَا أَيُّهَا النَّبِيُّ قُلْ لِأَزْوَاجِكَ إِن كُنْتُنَّ تُرِدْنَ الْحَيَاةَ الدُّنْيَا وَزِينَتَهَا فَتَعَالَيْنَ أُمَتِّعْكُنَّ وَأُسَرِّحْكُنَّ سَرَاحًا جَمِيلًا"** الأحزاب : ٢٨ يعني إيه ؟ إيه اللي جاب الآية دي بعد آية الأحزاب ؟ كأن الجهاد بيحجب الدنيا ، ما أنت لما تخرج تجاهد الدنيا هفتح عليك ، لما الدنيا جت بقي هتعملوا إيه ؟ ما هو نساء النبي لو أحنا كنا قبل كده بناخد ربع جنيه في اليوم ناكل بيه لأنك مكش معاك ، إنما دلوقتي لا ، الدنيا فتحت وبني قريظة فتحت والغنائم بتاعتها جت وإنت ليك خمس الغنائم وسع علينا ، أكلنا عيشنا فسحنا ، لبسنا وربنا الدنيا اللي أحنا أتحرمنا منها لأن الدنيا عادت موجودة ، السورة بتكرر رمز النفاق ورمز الصدق **"لَيْسَ الْبِرُّ بِالصَّادِقِينَ عَنْ صِدْقِهِمْ"** الأحزاب : ٨ **"مِنْ الْمُؤْمِنِينَ رِجَالٌ صَدَقُوا مَا عَاهَدُوا اللَّهَ عَلَيْهِ"** الأحزاب : ٢٣ السورة بتقولك إن الصادق ماهواش زاهد في الدنيا لأن هو معندهوش دنيا ، هو زاهد في الدنيا لأن كل طاقته لدين الله سبحانه وتعالى ، طيب وبعد كده لما الدنيا تفتح ميجبش الدنيا ويديها لنفسه ، الدنيا تروح للدين

**النبي صلى الله عليه وسلم ... المعطاء**

زي الرسول عليه الصلاة والسلام لما فتحت عليه الدنيا وداها كلها للدعوة ، كان الأموال بتاع البحرين تيجي أموال رهييه لم يعطي الرسول صلى الله عليه وسلم عطاء مثلها أبدا ، الصحابة داخلين ، كومة ذهب ، الفلوس زمان كانت ذهب وفضة ، كومة ذهب مهولة يقوم الرسول صلى الله عليه وسلم بعد الصلاة يقوم رايح قايل للصحابة **"أبشروا وأملوا ما يسركم"** صحيح

يارسول الله أنا علي دين ، خد ، يارسول الله أنا عايز أبني بيت ولا ، خد ، يارسول الله معرفش أنا غرمت غرامه في ديه واحد مقتول أوقاقل وعايز ادفعها ، خد خد ، الصحابة بيقلولوا في البخاري **"فقام رسول الله ولم يبق من هذا المال شيء"** مبقاش منها أي شيء ، خلصت كلها ، الخمس ؟ الرسول صلى الله عليه وسلم كان ليه الخمس ، الدنيا كلها خلصت عشان نصره الدعوة وعلشان نصره الدين ، يبقى إذا عدم الأفتتان بالدنيا وتوجيه الإمكانات الدنيوية من أجل نصره الدعوة

**مين يدافع عن دين الله ؟**

التانين مؤسسات بتنفق مليارات ، أنت لا عندك مؤسسات ولا عندك دول ، ولا عندك حاجة ، كله إنفاق فردي يبقى لازم نعوض بالإنفاق الفردي إنفاق الدول اللي هما بينفقوه ، أمريكا لما تدفع لها عشرة عشرين مليار علي

التنصير كل سنة ، وأوروبا لما تدفع لها عشرة عشرين ثلاثين مليار علي التنصير كل سنة ، ودي ودي ودي ودي والفاكتان لما يدفعوا معرفش إيه علي التنصير كل سنة ، وبعدين مين اللي يدفع للدعوة إلى الله ؟ ومين اللي يدفع لدين الله ؟ ومين اللي يدفع عن دين الله سبحانه وتعالى ؟ **يبقي إذا توجيه الإمكانيات الدنيوية وتوجيه الطاقات الدنيوية من أجل إعلاء كلمه الله و نصره الله ، وقد أفلح من صدق ، وقد أفلح من حمل الأمانة التي أشفقت منها السماوات والأرض والجبال ، وقد أفلح من كان رجلا صدق ما عاهد الله عليه ، فإما قضى نجه وإما ينتظر ، وما بدل تبديلا في طريق الدعوة إلى الله وطريق نصره دين الله سبحانه وتعالى**

### الواقع !!!

يبقي سورة الأحزاب الواقع اللي أحنا فيه ، الأحزاب الكفرية بتاعة الحرب وأمريكا ، والأحلاف اللي راحت العراق ، والأحزاب بتاعة العلمانية ، الجرائد والبرامج والفضائيات ، والبرامج اللي يجيبوها لك دائما علي الفضائيات ، شيخ و دائما بيكون ميعرفش يتكلم ، واحد أزهرى كده وخلص ، ومعا واحد علماني فصيح اللسان ، ويبدأوا يتناقشوا في قضية حساسة جدا في الدين عشان يطلعك في الآخر إن الشيخ ميعرفش حاجه !!! وإن الدين دي أي حاجه ! وأن أنتم مش فاهمين الدين صح ! إحنا اللي فاهمين الدين صح ! تعالوا بقي أما نعرفكوا الدين بتاعنا ولا الدين بتاعكوا ، عشان نقولكوا الإسلام الصحيح الصريح ، يبقي إذن يا جماعة دي كان موضوع سورة الأحزاب ، و هو كل واحد يشوفلوا ثغر يقف فيه في هذا الدين ، يا إما هتبقى منافق ، ياما هيبقى في قلبك مرض ، ياما هتبقى مؤمن صادق لا تبدل تبديلا ، بعد سورة الأحزاب هندخل في سوره إيه ؟ سبأ

### سورة سبأ

إحنا عايزين ال ٣ سور اللي جاين ندوق منهم ، إزاي ؟ سورة سبأ بتكلم عن إيه ؟ سورة سبأ أولها نموذجين : نموذج اللي شكر ، ونموذج اللي كفر ، نموذج داود وسليمان مشروحة في صفحة والصفحة اللي قصدها نموذج سبأ ، قبلهم كلام عن الله وبعدهم كلام عن الله ، الكلام اللي عن الله ده عن مشيئة الله وعن قدره الله ، وعلم الله وعظمة الله وملك الله سبحانه وتعالى ، الكلام ده قصاده ناس مع الله ، وقصاده ناس معرضة عن الله ، قصاده ناس شكرت وناس كفرت ، النموذجين قدامك "وَلَقَدْ آتَيْنَا دَاوُودَ مِنَّا فَضْلًا <sup>ط</sup>يَا جِبَالُ أَوِّبِي مَعَهُ وَالطَّيْرُ <sup>ط</sup>وَأَلْنَا لَهُ <sup>ط</sup>الْحَدِيدَ" سبأ : ١٠ الحديد ؟ آه يلين لسيدنا داود ليه ؟ عشان كان مع الله سبحانه وتعالى "وَأَلْنَا لَهُ <sup>ط</sup>الْحَدِيدَ" سبأ : ١٠ دي كلمه خطيرة أوي في القرآن

### نصرة الدين بالدنيا

"أَنْ أَعْمَلَ سَابِغَاتٍ وَقَدِّرَ فِي السَّرْدِ" سبأ : ١١ طريقة صناعة الدروع ، الدرع يبقي طويل ومغطي جسم الجندي "وَقَدِّرَ فِي السَّرْدِ" يعني الحلقات بتاعته دخل في بعض و محكمة ، ربنا بيقول لنا كيفية تصنيع التسليح في القرآن ، آه ، عشان نعرف خطورة العلوم الدنيوية ، وخطورة نصره الدين بالدنيا في القرآن ، بس خد بالك قبل ما ربنا يقول نصره الدين بالدنيا ، ربنا بيقول قبلها "يَا جِبَالُ أَوِّبِي مَعَهُ وَالطَّيْرُ" يبقي العبادة ، طيب "أَنْ أَعْمَلَ سَابِغَاتٍ وَقَدِّرَ فِي السَّرْدِ" سبأ : ١١ بعدها "وَأَعْمَلُوا صَالِحًا" يبقي العمل الصالح والعبادة ، ربنا حط نصره الدين بالدنيا قبلها عبادة وبعدها عبادة عشان تفهم أن أي حد بيقول لك : أنا بنصر الدين بالدنيا وهو عبادته ضعيفة ، عمرك



ماهتقدر تحكم نيتك لما الدنيا هتفتح عليك ، عمرك ما هتقدر تحكم نيتك ، إنما عايز تنصر الدين بالدنيا لازم تكون إنسان عابد عشان فعلا نيتك تفضل الله ، تدخلها الله وتخرج منها الله

سيدنا سليمان... واستثمار الدنيا للدين

"وَلِسُلَيْمَانَ الرِّيحَ غَدُوَهَا شَهْرٌ وَرَوَّاحُهَا شَهْرٌ وَأَسَلْنَا لَهُ عَيْنَ الْقِطْرِ" سبأ : ١٢ قصاص الحديد بتاع سيدنا داود النحاس في سيدنا سليمان "وَمِنَ الْجِنَّ مَنْ يَعْمَلُ بَيْنَ يَدَيْهِ بِإِذْنِ رَبِّهِ" سبأ : ١٢ شوفوا سيدنا سليمان لما الدنيا جت استثمارها في إيه ؟ "يَعْمَلُونَ لَهُ مَا يَشَاءُ مِنْ مَحَارِبٍ" سبأ : ١٣ أماكن للعبادة "وَتَمَثَّلَ" علي أحد الأقوال أي أمثال ما يحدث في البلاد الأخرى من أحوال الشرك أو الكفر ، عشان سيدنا سليمان يعلم حال أهل الأرض علي دين ربنا ولا لا ؟ علشان الدعوة إلى الله ، يبقى الدعوة إلى الله "وَجِفَانِ كَالْجَوَابِ وَقُدُورٍ رَاسِيَاتٍ" سبأ : ١٣ فيها الأكل والشرب عشان صنائع المعروف ، يبقى سيدنا سليمان سخر الملك من أجل العبادة والدعوة

سيدنا داود... ونصرة الدين

وسيدنا داود سخر الملك من أجل " أَنْ اَعْمَلْ سَابِغَاتٍ وَقَدِّرْ فِي السَّرْدِ" سبأ : ١١ من أجل الجهاد في سبيل الله يبقى الدنيا أستعملوها في نصرة الدين فعلا لأنهم كانوا قوما عبادا ، وربنا بيقلك فتح عليهم في الدنيا أد إيه وفتح عليهم في الإيمان والعبادة أد إيه ، ده نموذج الشاكر "اعْمَلُوا آلَ دَاوُودَ شُكْرًا" سبأ : ١٣ ده نموذج الشاكر نعم ربنا .... لكن الإنسان !!!

الكافر بقى "لَقَدْ كَانَ لِسَيِّ فِي مَسْكَنِهِمْ آيَةٌ" سبأ : ١٥ عايزين نشيل كلمة سبأ ونخط العراق ، نشيل كلمة سبأ ونخط لبنان ، نشيل كلمة سبأ ونخط الخليج ، ولو أن الخليج لسه مكملش السلسلة ، نشيل كلمة سبأ ونخط نفسنا ، ماشين في السكة أهوه بفضل الله ، نشيل كلمه سبأ ونخط أسمائنا للأسف "لَقَدْ كَانَ لِسَيِّ فِي مَسْكَنِهِمْ آيَةٌ جَنَّتَانِ عَنْ يَمِينٍ وَشِمَالٍ" سبأ : ١٥ امشي في أي طريق من طرق البلد ، أي طريق مسافر شربين بلقاس أي بلد ، عن يمينك جنة خضراء لآخر الأفق ، وعن شمالك جنة خضراء لآخر الأفق ، اللي سافر السعودية يشوف منظر غريب جدا عن يمينك صحراء وجبل لآخر الأفق ، وعن شمالك صحراء وجبل لآخر الأفق ، أنا سافرت السعودية مشوفتش منظر أخضر من يوم ما سافرت لغاية ما رجعت ، منظر أخضر علي الطريق !!! إنما أنت في مصر سبحان الله

"جَنَّتَانِ عَنْ يَمِينٍ وَشِمَالٍ كُلُوا مِنْ رِزْقِ رَبِّكُمْ وَاشْكُرُوا لَهُ" سبأ : ١٥ خليك شاكر "بَلَدَةٌ طَيِّبَةٌ وَرَبٌّ غَفُورٌ" سبأ : ١٥ "فَاعْرِضُوا فَاَرْسَلْنَا عَلَيْهِمْ سَيْلَ الْعَرِمِ" سبأ : ١٦ عقوبة المعصية "وَبَدَّلْنَاهُمْ بِجَنَّتَيْهِمْ جَنَّتَيْنِ" سبأ : ١٦ يعني فضلت الجنتين ، هتفضل تمشي في الطريق تلاقي علي يمينك جنة وعلي شمالك جنة ، بس فين الذهب الأبيض بتاع زمان ؟ وفين عود الدرة اللي كان بيطلع ٣ كيزان بتاع زمان ؟ وفين طعم الفراولة بتاع زمان ؟ وفين طعم الأكل والفاكهة بتاع زمان ؟ وفين الذهب الأصفر بتاع زمان ؟ وفين الزرع بتاع زمان ؟ وفين الغيطان بتاع زمان ؟ اللي كان يغطيك طول الزرع اللي فيها ، فين البركه بتاع زمان ؟

"وَبَدَّلْنَاهُمْ بِجَنَّتَيْهِمْ جَنَّتَيْنِ" سبأ : ١٦ جنتين بردوا ، أصل ربنا مبيسحبهاش مرة واحدة عشان الأنسان ممكن يتعظ "جَنَّتَيْنِ ذَوَاتِي أُكُلِ خَمْطٍ وَأَثَلٍ وَشَيْءٍ مِنْ سِدْرٍ قَلِيلٍ" سبأ : ١٦ الإنخساف وضياع البركة اللي حصلت "وَجَعَلْنَا

**بَيْنَهُمْ وَبَيْنَ الْقُرَى الَّتِي بَارَكْنَا فِيهَا قُرَى ظَاهِرَةً** سبأ : ١٨ الرزق بدأ يروح أهوه ياجماعة ، بدأت البطالة تظهر ، بدأ محدش مكفيه حاجة ، بدأ الفقر ينتشر ، بدأ المجتمع يبقى مجتمع طبقي ، بدأ كل الحاجات دي تحصل ، بس لسة نعمة الأمن ، لسة يعني ماشيين في بلدنا أمنين **"وَجَعَلْنَا بَيْنَهُمْ وَبَيْنَ الْقُرَى الَّتِي بَارَكْنَا فِيهَا" سبأ : ١٨** اللي هي زي قري فلسطين كده **"قُرَى ظَاهِرَةً" سبأ : ١٨** زي ما بينا وبين مصر مثلاً قري ، طول المسافة بينا وبين القاهرة قري ، يبقى إذا ده معناه إيه ؟ الأمن ، إن أنا طول ما أنا مسافر مش خايف أن حد يقطع علي الطريق ، لأن طول ما أنا مسافر ناس **"وَجَعَلْنَا بَيْنَهُمْ وَبَيْنَ الْقُرَى الَّتِي بَارَكْنَا فِيهَا قُرَى ظَاهِرَةً وَقَدَرْنَا فِيهَا السَّيْرَ" سبأ : ١٨** أنا طلعت من مصر الوقتي هتوصل بعد أد إيه ؟ بعد ساعتين ، لو كان في قطاع طرق كنت هقول الله أعلم هوصل بعد أد إيه ؟ دلالة الأمن ، عشان كدة ربنا قال **"سِيرُوا فِيهَا لِيَالِي وَأَيَّامًا آمِنِينَ"** يبقى لسه الأمن أهوه

**ظلموا انفسهم**

**"فَقَالُوا رَبَّنَا بَاعِدْ بَيْنَ أَسْفَارِنَا" سبأ : ١٩** الآية دي ياجماعة بتقول إيه ؟ يعني أنا لحد الآن ملاقتش مثلاً قول الواحد ممكن يطمئن أوى ليه ؟ ولكن الواحد من اللي شافوا في الواقع ده ممكن يبقى فيه نظرة في الآية دي **"فَقَالُوا رَبَّنَا بَاعِدْ بَيْنَ أَسْفَارِنَا" سبأ : ١٩** الآية اللي قبلها ربنا يقول إن الطرق التجارية بينهم وبين القرى المباركة بينا وبين بعض كمسلمين وأهل دين لسة مفتوحة ، يبقى إذا تاجروا مع المسلمين وربنا يبارك ، لا لا لا الأزمة الاقتصادية عالية لازم الحل بتاعها الإنفتاح والعملة مع العالم كله ، عايزين نساfer الصين ، ده اللي بيروح الصين بمليون بيرجع بأتنين مليون دي ، اللي بيروح جنوب شرق آسيا بمليون بيرجع بأتنين مليون ، طيب ياجماعة و المسلمين مايتجروش مع بعض ويبقى كل أعتمدنا عليه ؟ **"فَقَالُوا رَبَّنَا بَاعِدْ بَيْنَ أَسْفَارِنَا" سبأ : ١٩** يبقى إذا التشخيص الخاطي ، هم شخصوا قلة الرزق علي أن سببها أن مفيش شطارة ، طيب ما نباعد بين أسفارنا بقي عشان نجيب من البلاد البعيده تجارة وتبادل تجاري ، مفسروهاش علي إنها معاصي من الأصل ، الطمس علي البصيرة

**العقاب**

**"فَقَالُوا رَبَّنَا بَاعِدْ بَيْنَ أَسْفَارِنَا وَظَلَمُوا أَنْفُسَهُمْ فَجَعَلْنَاهُمْ أَحَادِيثَ" سبأ : ١٩** مرحلة لبنان اللي شوفناها وللأسف العراق **"أَحَادِيثَ"** يعني إيه ؟ يعني نفضل قاعدين كدة ياعيني شوفت بيعملوا إيه في أبو غريب ؟ يا عيني شوفت اللبنانيين متمزقين في الأرض إزاي ؟ بقي كلمة أحاديث ، الناس بقي قاعدين يتصعبوا عليهم **"وَمَزَقْنَاهُمْ كُلَّ مُمَزَّقٍ" سبأ : ١٩** زي لبنان كدة إتمزقت في الأرض كلها ، شوية في أستراليا ، شوية في أمريكا ، شوية في كل دولة أوروبية شوية مش عارف فين **"وَمَزَقْنَاهُمْ كُلَّ مُمَزَّقٍ إِنَّ فِي ذَلِكَ لآيَاتٍ لِّكُلِّ صَبَّارٍ شَكُورٍ \* وَلَقَدْ صَدَقَ عَلَيْهِمْ إِبْلِيسُ ظَنَّهُ" سبأ : ١٩ : ٢٠** إبليس قال أنا هضلهم وضلهم **"فَاتَّبَعُوهُ إِلَّا فَرِيقًا مِّنَ الْمُؤْمِنِينَ \* وَمَا كَانَ لَهُ عَلَيْهِمْ مِنْ سُلْطَانٍ إِلَّا لَنَعْلَمَ مَنْ يُّؤْمِنُ بِالْآخِرَةِ مِمَّنْ هُوَ مِنْهَا فِي شَكٍّ وَرَبُّكَ عَلَىٰ كُلِّ شَيْءٍ حَفِيزٌ" سبأ : ٢٠ : ٢١**

**الله هو الملك سبحانه وتعالى**

الآيات بتاعة الشكر والكفر مذكورين هنا أهم ، وربنا أدا لدول إيه وفتح عليهم أد إيه ، وربنا عاقب دول أد إيه في الدنيا ، الأثر الديني للدين ، الأثر الديني للطاعة في قصه داود وسليمان ، والأثر الديني للمعصية في قصة سبأ ، بعدها **"قُلِ ادْعُوا الَّذِينَ زَعَمْتُمْ مِنْ دُونِ اللَّهِ لَا يَمْلِكُونَ مِثْقَالَ ذَرَّةٍ فِي السَّمَاوَاتِ وَلَا فِي الْأَرْضِ" سبأ : ٢٢**

حد يملك يا جماعة شبر في الشمس ؟ حد يملك يا جماعة فدان في القمر ؟ حد له يا جماعة متر في متر في زحل ولا المشتري ؟ حد يملك أي شئ ؟ ده كل شئ ملك الله سبحانه وتعالى "لَا يَمْلِكُونَ مِثْقَالَ ذَرَّةٍ فِي السَّمَاوَاتِ وَلَا فِي الْأَرْضِ وَمَا لَهُمَا مِنْ شَرِكٍ" سبأ : ٢٢ ولا حتي ملكية مشتركة "وَمَا لَهُ مِنْهُمْ مِنْ ظَهِيرٍ" سبأ : ٢٢ ولاحد من دول أصلا يظهر مع الله سبحانه وتعالى أو يحمي أي حاجة لله ، يعني ملهمش أي وجود ، الله هو الملك الله هو المهيمن

"وَلَا تَنْفَعُ الشَّفَاعَةُ عِنْدَهُ إِلَّا لِمَنْ أَذِنَ لَهُ حَتَّىٰ إِذَا فُزِّعَ عَنْ قُلُوبِهِمْ" سبأ : ٢٣ شوف المنظر الملائكة قدام ربنا ، ربنا يصدر أمر من الأوامر للملائكة ، الملائكة كأنها بتروح في غيبوبة بتترجف وهي بتسمع الأمر "حَتَّىٰ إِذَا فُزِّعَ عَنْ قُلُوبِهِمْ" سبأ : ٢٣ خلاص بقى راح اللي كان فيه وربنا يصدر لهم الأمر "قَالُوا مَاذَا قَالَ رَبُّكُمْ قَالُوا الْحَقَّ" الله أكبر ، شايف الأستسلام ، شايف التعظيم ، شايف تعظيم ربنا سبحانه وتعالى ، شايف أد إيه ملك في الكون ، يبقي إذن القصتين قبلهم "الْحَمْدُ لِلَّهِ الَّذِي لَهُ" الملك "مَا فِي السَّمَاوَاتِ وَمَا فِي الْأَرْضِ وَلَهُ الْحَمْدُ فِي الْآخِرَةِ" سبأ : ١

الله هو الحكيم

"لَهُ الْحَمْدُ فِي الْآخِرَةِ" الحمد يعني الثناء ، كأن أي حاجة صدرك إرتاب منها في الدنيا أو أي مشكلة قلت يارب أنت عملت في كده ليه ؟ ولا في ده ليه كده ؟ ( تعليق : وهذا خطأ فلا يجوز الاعتراض على قدر الله ) لما هتشوف يوم القيامة المشهد الأخير هتقول يارب ليك الحمد ، هتشي علي الله يا جماعة كل القصص بتاعة الدنيا، المشهد الأخير بتاعها بتاع الآخره لسة متشافش ، مليار قصة معلق عليها المشهد الأخير في الآخرة ، لما هتشوف في الآخرة المشهد الأخير في كل قصة مشهد مشهد ، هيخلينا نقول يارب فعلا الحمد ليك يارب، الثناء عليك يارب ، فهذا دلالة على إن فعلا ربنا إله حكيم "وَهُوَ الْحَكِيمُ الْخَبِيرُ" سبأ : ١

الله هو الرحيم الغفور

"يَعْلَمُ مَا يَلِجُ فِي الْأَرْضِ وَمَا يَخْرُجُ مِنْهَا وَمَا يَنْزِلُ مِنَ السَّمَاءِ وَمَا يَعْرُجُ فِيهَا وَهُوَ الرَّحِيمُ الْغَفُورُ" سبأ : ١ ليه الرحيم الغفور ؟ كل القرآن الغفور الرحيم ، لأ دي هنا زي "بَلَدَةٌ طَيِّبَةٌ وَرَبُّ غَفُورٌ" سبأ : ١٥ رحيم : يعني إدانا بلد جميلة ، بلد كلها أمن وبلد فيها أطول نهر في العالم ، وبلد بيغطيها بحرين من أكبر بحار اللي مليانه سمك في العالم ، وبلد فيها وفيها وفيها ، يبقي ده الرحيم ، طيب ولو عصينا بس رجعنا وتبنا الغفور يبقي ربنا هنا بيتكلم عن حاجة تانية يا جماعة ، أد إيه ربنا رحيم معنا ، وأد إيه ربنا سبحانه وتعالى غفور معنا ، دي يعني أيه ؟ الرشفة من الرحيق اللي إحنا رشفناها من سورة سبأ

سورة فاطر

عايزين نرشف رشفه صغيرة بقى من سورة فاطر ، سورة فاطر دي جميلة أوي يا جماعة ، حتي إسمها فاطر ، مبتحسش في قلبك بحاجه كدة وأنت بتسمع كلمة فاطر ؟ دي بتحسك بعظمة ، بقدرة ، مين اللي خلق كل ده ؟

سورة فاطر بتكلم عن آيه ؟ سورة فاطر من أول تلت آيات بتعرفك بتكلم عن آيه ؟ **"الْحَمْدُ لِلَّهِ فَاطِرِ السَّمَاوَاتِ وَالْأَرْضِ"** فاطر : ١ اللي خلق كل ده ، ده اللي أنشأه من الأصل أصلا ، فاطر السماوات والأرض ، كلمة الخلق ممكن معناها إن حاجة تخلق منها حاجة ، إنما كلمة الفطر إن حاجة من الأساس أنشئت أصلا

**"فَاطِرِ السَّمَاوَاتِ وَالْأَرْضِ جَاعِلِ الْمَلَائِكَةِ رُسُلًا أُولِي أَجْنَحَةٍ مِّثْنَى"** فاطر : ١ وأكثر **"وَتِلْكَ"** وأكثر **"وَرُبَّاعٍ"** وأكثر **"يَزِيدُ فِي الْخَلْقِ مَا يَشَاءُ"** في الملائكة وفي كل خلق من خلق الله سبحانه وتعالى **"إِنَّ اللَّهَ عَلَى كُلِّ شَيْءٍ قَدِيرٌ"** فاطر : ١ يبقى أولها عظمة الله سبحانه وتعالى ، بعد كدة **"مَا يَفْتَحِ اللَّهُ لِلنَّاسِ مِنْ رَحْمَةٍ فَلَا مُمْسِكَ لَهَا"** فاطر : ٢ اوعوا تفتكروا إن ربنا لو فتح للناس باب رحمة في الدين أو في الدنيا حد هيقدر يمسكها **"وَمَا يُمْسِكُ فَلَا مُرْسِلَ لَهُ مِنْ بَعْدِهِ"** فاطر : ٢ يعني آيه ؟ **النفع والضرر بيد ربنا سبحانه وتعالى**

الله هو الرازق

طيب الآية الثالثة قبل ما نقول التلت آيات بيعرفونا موضوع السورة إزاي **"يَا أَيُّهَا النَّاسُ اذْكُرُوا نِعْمَتَ اللَّهِ عَلَيْكُمْ هَلْ مِنْ خَالِقٍ غَيْرُ اللَّهِ يَرْزُقُكُمْ مِنَ السَّمَاءِ وَالْأَرْضِ"** فاطر : ٣ يا أخي انت مين اللي أكلك أمبارح ؟ مين اللي فطرك أمبارح ؟ ربنا ، طب وأول أمبارح ؟ ربنا ، طب وأول أول ؟ ربنا ، انت بتحب حد غير ربنا ؟ يعني في شاب بيعب واحدة مثلا ، طيب تخيل لو هي اللي بتأكلك كل يوم ، كانت عملت إيه ؟ يومين وكانت عملت فيك حاجه ، كانت ولعت فيك ، كل يوم هأكلك ولا إيه ؟ **تخيل إن كل لقمة أتخطط في بقك من يوم ما أتولدت لغاية دلوقتي من ربنا سبحانه وتعالى**

الله هو العظيم

**"هَلْ مِنْ خَالِقٍ غَيْرُ اللَّهِ يَرْزُقُكُمْ مِنَ السَّمَاءِ وَالْأَرْضِ لَا إِلَهَ إِلَّا هُوَ فَآَنَى تُؤْفَكُونَ"** فاطر : ٣ الآية الأولى بتكلم عن العظمة والآية الثالثة عن النعمة ، العظمة والنعمه يجيبوا مقام **الإنكسار** ، إنك أنت انكسرت أمام العظمة ، ويقول لك يا أخي ده كسر عيني الحاجة اللي عملها لي يبقى **الإنكسار** يجي بعد العظمة أو بعد النعمة ، طيب لما تعرف أن النفع والضرر بيد ربنا ، والرحمة والأمساك بيد ربنا ، يجي **الإفتقار** ، أنا عايز يارب بقي تبعد عني كل ضرر وتجيبي كل نفع ، يبقى **سورة فاطر من أولها بتكلمك عن الإفتقار والإنكسار** ، وكل آيات السورة من أولها لأخرها بعد كدة بتكلمك يا إما عن **الأفتقار** يا إما عن **الإنكسار**

وأمام هذا **الأفتقار** و هذا **الأنكسار** ... **الإستغناء والإستعلاء** !

**"يَا أَيُّهَا النَّاسُ إِنَّ وَعْدَ اللَّهِ حَقٌّ فَلَا تَغُرَّنَّكُمُ الْحَيَاةُ الدُّنْيَا وَلَا يَغُرَّنَّكُمُ بِاللَّهِ الْغُرُورُ"** فاطر : ٥ يبقى في غرورين حصلوا للإنسان ، غرور في الدنيا و غرور بالله ، غرور بالله يعني آيه ؟ زي ما أقتال في الطائف كده " أغروا بالرسول سفهائهم " يعني أنك أنت تترل للإنسان عن قدره ، **والغرور بالله : إن الناس يتزلوا الله عن قدره في قلوبهم** **الغرور في الدنيا : إن الناس ترفع قدر الدنيا عن حقيقتها في قلوبها** ، يبقى إذن ربنا بيقلك إيه ؟ **الإستعلاء بالدنيا وتعظيم الدنيا ضد الإنكسار بين يدي الله وتعظيم الله**

وبعد كدة **"يَا أَيُّهَا النَّاسُ أَنْتُمُ الْفُقَرَاءُ إِلَى اللَّهِ وَاللَّهُ هُوَ الْغَنِيُّ الْحَمِيدُ"** مش أنتم فقراء **"أَنْتُمْ الْفُقَرَاءُ"** أنتوا اللي فقراء ، كأن الناس بتتعامل مع ربنا بإستغناء ، كأن ربنا يقول إنتوا مستغنين عني ؟ ده أنتوا اللي محتاجيني **"أَنْتُمْ"**

**الْفُقَرَاءُ إِلَى اللَّهِ وَاللَّهُ هُوَ الْغَنِيُّ الْحَمِيدُ** " شوف ربنا يقول للناس إيه يا جماعة ؟ إنتم اللي محتاجنلى ، أنا اللي غنى عنكم ، بقى اللي غنى عنكوا هو اللي بيطلبكوا وبيتودد إليكم !!!! واللي محتاجين ربنا في النفس قبل بق المية ، وفي بق المية قبل اللقمة ، وفي اللقمة قبل اللحظة اللي هتعيشها في حياتك ، اللي محتاج ربنا كل ده هوا اللي يتبغدد !!! وهو اللي يدلوا ضهره !!! سبحان الله ! يبقى ربنا من أولها بيقولك الإنكسار والإفتقار اللي يليقوا بمقام الله ، والإستغناء والإستعلاء اللي الأنسان فيهم !!!

**"وَمَا يَسْتَوِي الْبَحْرَانِ هَذَا عَذْبٌ فُرَاتٌ سَائِغٌ شَرَابُهُ وَهَذَا مِلْحٌ أُجَاجٌ وَمِنْ كُلٍّ تَأْكُلُونَ لَحْمًا طَرِيًّا وَتَسْتَخْرِجُونَ حَلِيَّةً تَلْبَسُونَهَا"** فاطر : ١٢ بعدها **"يُولِجُ اللَّيْلُ فِي النَّهَارِ وَيُولِجُ النَّهَارُ فِي اللَّيْلِ"** كل ده تبع عظمه الله اللي تبع الإنكسار ، طيب والإفتقار في آخر السورة **"إِنَّ اللَّهَ يُمْسِكُ السَّمَاوَاتِ وَالْأَرْضَ أَنْ تَزُولَا"** فاطر : ٤١ دي مش هتختفي دي هتزل ده ، لو ربنا سابنا هنتمحي أصلا ، هنتمحي من الوجود **"إِنَّ اللَّهَ يُمْسِكُ السَّمَاوَاتِ وَالْأَرْضَ أَنْ تَزُولَا وَلَئِنْ زَالَا إِذِ انْمَسَكَهُمَا مِنْ أَحَدٍ مِنْ بَعْدِهِ إِنَّهُ كَانَ حَلِيمًا غَفُورًا"** فاطر : ٤١ يبقى الإفتقار والإنكسار أمامهم الأستغناء والأستعلاء ، وفي النص ربنا سبحانه وتعالى هتلاقي وأنت ماشي بقي يعني كل الآيات اللي بتسمعا عن ربنا في السورة ، هتلاقيها يا إنكسار يا إفتقار **"أَلَمْ تَرَ أَنَّ اللَّهَ أَنْزَلَ مِنَ السَّمَاءِ مَاءً فَأَخْرَجْنَا بِهِ ثَمَرَاتٍ مُخْتَلِفًا أَلْوَانُهَا أَلْوَانُهَا ۖ وَمِنَ الْجِبَالِ جُدَدٌ بَيَضٌ وَحُمْرٌ مُخْتَلِفٌ أَلْوَانُهَا وَغَرَابِيبُ سُودٌ"** فاطر : ٢٧ **"وَمِنَ النَّاسِ وَالْدَّوَابِّ وَالْأَنْعَامِ مُخْتَلِفٌ أَلْوَانُهُ كَذَلِكَ ۖ إِنَّمَا يَخْشَى اللَّهَ مِنْ عِبَادِهِ الْعُلَمَاءُ"** فاطر : ٢٨ الخشية ، مقام الإنكسار بين ايدين ربنا لما عرفت قدرة ربنا في الخلق أد إيه

أنت مين في التلاته ؟

وفي نص السوره ربنا يقول لك **"ثُمَّ أَوْرَثْنَا الْكِتَابَ الَّذِينَ اصْطَفَيْنَا مِنْ عِبَادِنَا"** فاطر : ٣٢ المسلمين **"فَمِنْهُمْ ظَالِمٌ لِنَفْسِهِ"** فاطر : ٣٢ إحنا شايفينهم بره **"وَمِنْهُمْ مُقْتَصِدٌ"** فاطر : ٣٢ بيدخل يخطف الركعتين ويخرج **"وَمِنْهُمْ سَابِقٌ بِالْخَيْرَاتِ يُاذِنُ اللَّهُ ۚ ذَلِكَ هُوَ الْفَضْلُ الْكَبِيرُ"** فاطر : ٣٢ إنت مين في التلاته ؟ إنت إفتقارك وإنكسارك لله كان علي أد أنك تبقي انسان ظالم مستغني مستعلي ؟ ولا مقتصد ؟ أو بين بين ؟ ولا منكسر مفتقر وهو ده السابق بالخيرات ياذن الله **"ذَلِكَ هُوَ الْفَضْلُ الْكَبِيرُ"** فاطر : ٣٢ الإفتقار إلى الله في الهدايه ، المشاعر دي مش هتيجي غير من الله سبحانه وتعالى

### سورة يس

سوره يس آخر سوره معنا، بتكلم عن إيه ؟ فاكرين سوره الروم يا جماعة ؟ فاكرين لما اتكلمنا عن الروم ؟ قلنا الروم دي إيه ؟ حد يقول لي ؟ طلاقات ، جزاك الله خيرا ، الروم دي طلاقات ، طلاقات أجنة ونازلة علي قلبك ، يس كده يا جماعة ، طلاقات عن قدرة الله الباهرة ، لما تيجي تقرأ يس تحس أد إيه قدرة الله الباهرة وأنت بتقرأ هذه السوره من أولها كده **"يس\* وَالْقُرْآنِ الْحَكِيمِ"** يس ١ : ٢ أحكام نزل من السما **"إِنَّكَ لَمِنَ الْمُرْسَلِينَ"** يس : ٣



"عَلَى صِرَاطٍ مُسْتَقِيمٍ \* تَنْزِيلَ الْعَزِيزِ الرَّحِيمِ" يس ٤ : ٥ شوفوا يا جماعة قدره الله الباهرة في السورة من أولها لأخرها ، كل آية بتبينلك قدرة الله أد إيه "إِنَّا جَعَلْنَا فِي أَعْنَاقِهِمْ أَغْلَالًا فَهِيَ إِلَى الْأَذْقَانِ فَهُمْ مُقْمَحُونَ" يس : ٩ أد إيه ربنا متحكم فيهم في الدنيا والآخرة ومتحكم في قلوبهم "وَجَعَلْنَا مِنْ بَيْنِ أَيْدِيهِمْ سَدًّا وَمِنْ خَلْفِهِمْ سَدًّا" يس : ٩ ماهماش عارفين يوصلوا لرسول الله صلى الله عليه وسلم إزاي ، مش عارفين يجاربوا إزاي ، قدرة الله علي رد كيد أهل الباطل ، وعلي رد مكرهم في نخورهم ، أد إيه الله قادر أنه يشلهم في الدنيا قبل الآخرة ، ويجبط كيدهم في الدنيا قبل الآخرة "إِنَّا نَحْنُ نُحْيِي الْمَوْتَى" قدرة باهرة

### إحصاء الأعمال ... من قدرة الله الباهرة

ومش بس كدة "وَنَكْتُبُ مَا قَدَّمُوا" سبحان الله ! شايفين قدرة ربنا علي الإحصاء "وَأَنآرَهُمْ" أنت كلمت واحد في الدين ، الواحد ده بعد تلت سنين ألنزم ، أما ألنزم بعد أربع سنين كلم واحد ألنزم ، اللي ألنزم ده صلي وصام وزكي بسببك ، إحصاء توابع الأعمال الصالحة ، وبردوا بالعكس توابع الأعمال السيئة ، انت مثلا بصيت بصة أنتي لبستي لبس معين بنت طلعت قلدتك ، البنت لما قلدتك قامت واحدة قلدها ، يبقى إذا إحصاء الأعمال ودي من القدرة الباهرة لله سبحانه وتعالى "إِنَّا نَحْنُ نُحْيِي الْمَوْتَى وَنَكْتُبُ مَا قَدَّمُوا وَآثَارَهُمْ" وَكُلَّ شَيْءٍ أَحْصَيْنَاهُ فِي إِمَامٍ مُّبِينٍ" يس : ١٢

### قدره الله علي إهلاك اللي يعصيه

"وَاضْرِبْ لَهُم مَّثَلًا أَصْحَابَ الْقَرْيَةِ إِذْ جَاءَهَا الْمُرْسَلُونَ" "إِذْ أَرْسَلْنَا إِلَيْهِمُ اثْنَيْنِ فَكَذَّبُوهُمَا فَعَزَّزْنَا بِثَالِثٍ فَقَالُوا إِنَّا إِلَيْكُم مُّرْسَلُونَ" يس ١٣ : ١٤ قلنا قبل كدة إحنا تعزيز لبعض ، الشيوخ اللي بيتكلموا تعزيز لبعض ، الإخوة اللي بيدعوا إلى الله تعزيز لبعض ، الملتزمين اللي قاعدين كلنا تعزيز لبعض يا جماعة ، بعد كده يا جماعة ربنا يقول في آخر السورة : "وَمَا أَنزَلْنَاهُ عَلَىٰ قَوْمِهِ مِنْ بَعْدِهِ مِنْ جُنْدٍ مِنَ السَّمَاءِ وَمَا كُنَّا مُنْزِلِينَ \* إِن كَانَتْ إِلَّا صَيْحَةً وَاحِدَةً" يس ٢٨ : ٢٩ يعني ده أنت مفكش نفخه ، ده الصيحة أقل من النفخة ، دى الصيحة ده صوت أقل من النفخة حتى "إِن كَانَتْ إِلَّا صَيْحَةً وَاحِدَةً ن كَانَتْ إِلَّا صَيْحَةً وَاحِدَةً فَإِذَا هُمْ جَمِيعٌ لَدَيْنَا مُحْضَرُونَ" يس : ٥٣ ربنا قال بعدها في السورة "وَيَقُولُونَ مَتَىٰ هَٰذَا الْوَعْدُ" يس : ٤٨ اللي هوا الآخرة "إِن كُنْتُمْ صَادِقِينَ" يس : ٤٨ ربنا قال نفس الكلمة "مَا يَنْظُرُونَ إِلَّا صَيْحَةً وَاحِدَةً تَأْخُذُهُمْ وَهُمْ يَخِصِّمُونَ" يس : ٤٩ "إِن كَانَتْ إِلَّا صَيْحَةً وَاحِدَةً فَإِذَا هُمْ جَمِيعٌ لَدَيْنَا مُحْضَرُونَ" يس : ٥٣ يعني البشر في الدنيا والآخرة مفيهومش صيحة ، من ربنا الملك القدير العظيم في قدرته المبهر في قدرته سبحانه وتعالى ، يبقى القوم دول كلهم مكش فيهم صيحة

### لو بتحب الدين ... مش هتستنى حد يكلفك بدور

متعدوش يا جماعة القصة دي يا جماعة من غير حبيب النجار ، يا جماعة حبيب النجار وهو واقف قدام قومه "وَجَاءَ مِنْ أَقْصَى الْمَدِينَةِ رَجُلٌ يَسْعَى" يس : ٢٠ شايفين راجل ويسعي عشان الدين ، سرعة وقوة وإنطلاق عشان الدين

"قَالَ يَا قَوْمِ اتَّبِعُوا الْمُرْسَلِينَ" يس : ٢٠ يا حبيب يا نجار ده في تلت رسل ، انت مالك ، ده فيه شيوخ كتير أوي ، انت مالك ، أنا الدين دي مسئوليتي ، حتي لو في أنبياء أنا أدعوا إلى الله ، لو كان واحد مننا له عذر أنه يطل دعوة كان حبيب النجار له عذر أنه يطل دعوة ، شايفين يا جماعة تلت أنبياء وقام يدعوا إلى الله معاهم ، ما أنت لو بتحب الدين مش هتستني تقول أنا ليا دور ولا مليش دور ، لو بتحب الدين ، لوخايف علي الدين ، لوخايف علي الناس من النار مش هتستني أن حد يكلفك بدور ، رجل من أقصى المدينة ، شايف جه منين عشان الدعوة إلى الله "قَالَ يَا قَوْمِ اتَّبِعُوا الْمُرْسَلِينَ \* اتَّبِعُوا مَنْ لَا يَسْأَلُكُمْ أَجْرًا" يس ٢٠ : ٢١ مهماش عايزين منكوا حاجة "وَهُمْ مُهْتَدُونَ \* وَمَا لِي لَا أَعْبُدُ الَّذِي فَطَرَنِي وَإِلَيْهِ تُرْجَعُونَ" يس ٢١ : ٢٢ يااا ، أنتوا عايزين إيه ؟ الآلهة بتعكوا دول لو ربنا أرداني بضر أوبنفع محدش هينقذني من حاجة "إِنِّي آمَنْتُ بِرَبِّكُمْ فَاسْمِعُونِ" يس : ٢٥ لوحده في وش الناس دي كلها ، قتلوه "قِيلَ ادْخُلِ الْجَنَّةَ" يس : ٢٦ الله أكبر ، فما عليك لو قمت لله قومة أعطاك الله بها الجنة ، ما عليك لو قمت لله تنصر دين الله سبحانه وتعالى فأعطيت الجنة "قِيلَ ادْخُلِ الْجَنَّةَ" يس : ٢٦

شاييل هم الدين ... بعد ما ماتت !!!

لسة هم قومه شيله حتي بعد ما مات ، ياسلام يارب "قَالَ يَا لَيْتَ قَوْمِي يَعْلَمُونَ" يس : ٢٦ هم الدين حتي بعد ما مات ، حتي بعد ما مات !!! أي والله يا جماعة "قَالَ يَا لَيْتَ قَوْمِي يَعْلَمُونَ \* بِمَا غَفَرَ لِي رَبِّي وَجَعَلَنِي مِنَ الْمُكْرَمِينَ \* وَمَا أَنْزَلْنَا عَلَى قَوْمِهِ مِنْ بَعْدِهِ" يس ٢٦ : ٢٨ "مِنْ بَعْدِهِ" مش من بعدهم ، شايفين ربنا كرمه أد إيه ؟ شايفين يا جماعة ؟ مش من بعد الأنبياء ، من بعده هو "مِنْ جُنْدٍ مِنَ السَّمَاءِ وَمَا كُنَّا مُنْزِلِينَ \* إِنْ كَانَتْ إِلَّا صَيْحَةً وَاحِدَةً" يس ٢٨ : ٢٩

قدره الله المبهرة في الكون

"وَآيَةٌ لَهُمُ الْأَرْضُ الْمَيِّتَةُ أَحْيَيْنَاهَا" يس : ٣٣ إزاي يارب ؟ قدرة باهرة "وَأَخْرَجْنَا مِنْهَا حَبًّا فَمِنْهُ يَأْكُلُونَ" يس : ٣٣ رغيف العيش ده خرج من الطين ده "فَمِنْهُ يَأْكُلُونَ" يس : ٣٣ "سُبْحَانَ الَّذِي خَلَقَ الْأَزْوَاجَ كُلَّهَا مِمَّا تُنْبِتُ الْأَرْضُ وَمِنْ أَنْفُسِهِمْ وَمِمَّا لَا يَعْلَمُونَ" يس : ٣٦ مفيش حاجة وقفت أمام قدره الله "وَكَانَ اللَّهُ عَلَى كُلِّ شَيْءٍ قَدِيرًا" الأحزاب : ٢٧ "وَكَانَ اللَّهُ بِكُلِّ شَيْءٍ مُحِيطًا" النساء : ١٢٦ "إِنَّ اللَّهَ كَانَ عَلَى كُلِّ شَيْءٍ شَهِيدًا" النساء : ٣٣ سبحان الله العلي العظيم "وَمِنْ كُلِّ الثَّمَرَاتِ جَعَلَ فِيهَا زَوْجَيْنِ اثْنَيْنِ" الرعد : ٣ كلمة "كُلُّ" دي ما فيش حاجة وقفت أمام قدرة الله أبدا "الَّذِي أَحْسَنَ كُلَّ شَيْءٍ خَلَقَهُ" السجدة : ٧ ما فيش حاجة وقفت أمام قدرة الله الباهرة أبدا ، شايفين ؟ "وَآيَةٌ لَهُمُ اللَّيْلُ" يس : ٣٧ شايفين الفلك يا جماعة ؟ "نَسْلَخُ مِنْهُ النَّهَارَ فَإِذَا هُمْ مُظْلِمُونَ" يس : ٣٧ ده إحنا كنا الوقت بالنهار ، إيه اللي جاب الليل ده ؟ سبحان ربي

"وَالشَّمْسُ تَجْرِي لِمُسْتَقَرٍّ لَهَا" يس : ٣٨ ده تقدير ، ده ربنا مقدر وحاكمها بالثانية "ذَلِكَ تَقْدِيرُ الْعَزِيزِ الْعَلِيمِ \* وَالْقَمَرَ قَدَرْنَاهُ مَنَازِلَ" يس ٣٨ : ٣٩ كل مترل في ميعاد باللحظة ميتأخرش عن ميعاده اللي ربنا كتبه عليه "حَتَّىٰ عَادَ كَالْعُرْجُونِ الْقَدِيمِ \* لَا الشَّمْسُ يَنْبَغِي لَهَا أَنْ تُدْرِكَ الْقَمَرَ وَلَا اللَّيْلُ سَابِقُ النَّهَارِ" يس ٣٩ : ٤٠ الكون محكوم بأمر

ربنا وبترتيب ربنا باللحظة ، كل واحد له لحظة يطلع فيها ، وإتجاه هيمشي فيه ، ومدار مش هيخرج عنه ، وسرعه هيجري بيها ، ومستقر هيزدب إليه ، كل واحد جي بعد حاجة وجي قبل حاجة

ترتيب الملك لهذا الكون ، قدرة الله المبهرة في الكون **"وَأَيَّةٌ لَهُمْ"** يس : ٤١ قدرة ربنا في الدنيا **"أَنَا حَمَلْنَا ذُرِّيَّتَهُمْ فِي الْفُلِّ الْمَشْحُونِ"** يس : ٤١ السفن الضخمة اللي بنشوفها دلوقتي **"وَخَلَقْنَا لَهُمْ مِنْ مِثْلِهِ مَا يَرْكَبُونَ"** يس :

٤٢ "العربيات والطيارات على أحد التفسيرات ياجماعة ، كأن الحاجات دي كلها من خلق الله **"وَإِنْ نَشَأْ نُغْرِقْهُمْ فَلَا صَرِيخَ لَهُمْ وَلَا هُمْ يُنْقَذُونَ"** يس : ٤٣ بعد كده قدرة الله علي البعث **"وَيَقُولُونَ مَتَى هَذَا الْوَعْدُ إِنْ كُنْتُمْ صَادِقِينَ \* مَا يَنْظُرُونَ إِلَّا صَيْحَةً وَاحِدَةً تَأْخُذُهُمْ وَهُمْ يَخِصِّمُونَ"** يس ٤٨ : ٤٩

### الجنة... أصناف نعيم

**"إِنَّ أَصْحَابَ الْجَنَّةِ الْيَوْمَ فِي شُغْلٍ فَاكِهِونَ"** يس : ٥٥ قدرة الله علي خلق أنواع وأصناف من النعيم في الجنة تخلي اللي يدخل الجنة مهواش عارف ياخذ إيه ؟ ويسيب إيه ؟ **"فِي شُغْلٍ"** مشغول ! مش عارف يودي أصناف النعيم دي كلها إزاي ؟ يعني من كتر أصناف النعيم بقي زي اللي وراه ميت ألف حاجة في الدنيا ومش عارف يجمع ما بينها **"فِي شُغْلٍ فَاكِهِونَ \* هُمْ وَأَزْوَاجُهُمْ فِي ظِلَالٍ عَلَى الْأَرَائِكِ مُتَكِئُونَ \* لَهُمْ فِيهَا فَاكِهَةٌ وَلَهُمْ مَا يَدْعُونَ \* سَلَامٌ قَوْلًا مِنْ رَبِّ رَحِيمٍ"** يس ٥٥ : ٥٨ الإله اللي بقدرته عذب دول وأهلك دول هو اللي بيسلمك سبحانه وتعالى ، ربنا اللي بيسلمك من أي أذي

### نطق الأعضاء... قدرة الله

شوف بعد كدة ياجماعة ، قدرة ربنا في اليوم الآخر ، شوف الألفاظ **"الْيَوْمَ نَخِيمُ عَلَى أَفْوَاهِهِمْ وَتُكَلِّمُنَا أَيْدِيهِمْ وَتَشْهَدُ أَرْجُلُهُمْ بِمَا كَانُوا يَكْسِبُونَ"** يس : ٦٥ قدرة الله علي إنه ينطق الإيد والرجل ، قدرة الله علي أنه ينطق كل شيء **"قَالُوا أَنْطَقْنَا اللَّهَ الَّذِي أَنْطَقَ كُلَّ شَيْءٍ"** فصلت : ٢١ **"وَلَوْ نَشَاءُ لَمَسَخْنَاهُمْ عَلَى مَكَانَتِهِمْ"** يس : ٦٧ **"وَلَوْ نَشَاءُ لَطَمَسْنَا عَلَى أَعْيُنِهِمْ"** يس : ٦٦ شوف كلمة **"وَلَوْ نَشَاءُ"** مشيئة ربنا متحركة في كل شيء ، مشيئة ربنا بيخضع ليها كل شيء

### ثم الصفحة الأخيرة من سورة يس

اللي الأئمة بيحبوها أوي يقرأوها في المغرب والعشاء ، اللي بتكلم عن قدره الله علي الخلق والتخليق **"أَوَلَمْ يَرَوْا"** يس : ٧١ مش ألم يروا **"أَوَلَمْ يَرَوْا"** الواو دي أفادت التعجب هما مبيشوفوش ؟ الناس دي مبيتحسش علي دمها ؟ الناس دي مبيفهمش ؟ **"أَوَلَمْ يَرَوْا أَنَّا خَلَقْنَا لَهُمْ مِنْ مِثْلِ أَيْدِينَا"** يس : ٧١ شايف نعمة ربنا عليك ؟ **"أَنْعَمًا فَهُمْ لَهَا مَالِكُونَ"** والله المثل الأعلي ، لما المرأة تعمل لزوجها أكلة وتتودد إليه ، وتقولوا كل دي أنا عاملاها لك بإيه ؟ ياديه ، سبحان الله

**خلق الأنعام**

شوف تودد ربنا، والله المثل الأعلى ، شايف تودد الملك "أَنَا خَلَقْنَا لَهُمْ مِمَّا عَمِلَتْ أَيْدِينَا أَنْعَامًا" يس : ٧١  
 خلق الأنعام ، الأنعام دي يا جماعة آية من آيات ربنا المبهرة ، يعني أخ كان جاي دلوقتي بيقولي يعني يقرأ في آية الحج ، فلقي إن ربنا بيقول إن الحج ده إنتم رايحينه عشان تشكروا ربنا علي نعمه الأنعام ، فمستغرب يا جماعة دي الأنعام دي ، المشركين أنفسهم من كتر أدراكهم لخطورتها ، يا أما عبدوها زي المصريين القدماء وزي الهنود وزي ، يا أما تعبدوا للألهة بتاعتهم بيها زي مشركي العرب التحليل والتحرير في الأنعام ، الأنعام دي يا جماعة حاجة معجزة من معجزات ربنا "أَنَا خَلَقْنَا لَهُمْ مِمَّا عَمِلَتْ أَيْدِينَا أَنْعَامًا \* وَذَلَّلْنَاهَا لَهُمْ فَمِنْهَا رَكُوبُهُمْ وَمِنْهَا يَأْكُلُونَ"  
 يس : ٧١ : ٧٢

**خلق السماوات والأرض**

بعد كده المشهد الثاني من مشاهد القدرة "أَوَلَيْسَ الَّذِي خَلَقَ السَّمَاوَاتِ وَالْأَرْضَ بِقَادِرٍ عَلَىٰ أَنْ يَخْلُقَ مِثْلَهُمْ"  
 يس : ٨١ خلق الأنعام ، خلق السماوات والأرض ، والآية اللي قبلها لما جه المشرك فتفت العظام قدام رسول الله صلي الله عليه وسلم "مَنْ يُحْيِي الْعِظَامَ وَهِيَ رَمِيمٌ" يس : ٧٨ فربنا بيرد عليه "قُلْ يُحْيِيهَا الَّذِي أَنْشَأَهَا أَوَّلَ مَرَّةٍ ۚ وَهُوَ بِكُلِّ خَلْقٍ عَلِيمٌ" يس : ٧٩

**قدرة الله علي التخليق**

"الَّذِي جَعَلَ لَكُم مِّنَ الشَّجَرِ الْأَخْضَرِ نَارًا" يس : ٨٠ قدره الله علي التخليق ، أنه يخلق من الورق الأخضر نار  
 "فَإِذَا أَنْتُمْ مِنْهُ تُوقَدُونَ \* أَوَلَيْسَ الَّذِي خَلَقَ السَّمَاوَاتِ وَالْأَرْضَ بِقَادِرٍ عَلَىٰ أَنْ يَخْلُقَ مِثْلَهُمْ ۚ بَلَىٰ ۚ وَهُوَ الْخَلَّاقُ الْعَلِيمُ \* إِنَّمَا أَمْرُهُ إِذَا أَرَادَ شَيْئًا أَنْ يَقُولَ لَهُ كُنْ فَيَكُونُ" يس : ٨٠ : ٨٢  
 ربنا لم يقل في الوجود كله حاجة كن مرتين ، كن مرة يبقى كن كما أردها الله أن تكون "فَسُبْحَانَ الَّذِي" يس :  
 ٨٣ والله المثل الأعلى "بِيَدِهِ مَلَكُوتُ كُلِّ شَيْءٍ وَإِلَيْهِ تُرْجَعُونَ" يس : ٨٣ لما أقولك أنا الموضوع دي بأيدي ، تمام التحكم والسيطرة ، تمام تحكم ربنا في كل شيء في الكون ، يبقى سورة يس طلقات علي قدرة الله الباهرة في الكون وفي الدنيا وفي الآخرة ، وعلي الثواب وعلي العقاب ، وعلي الرفع وعلي الخفض ، وعلي الرزق وعلي البسط والقبض وعلي كل شيء في هذا الكون قدرة الله الباهرة  
 يعني أعتقد أن إحنا ألينا إمام سريع بال ٨ سور بتوع هذا الشوط ، هنبدا بكرة إن شاء الله يا جماعة هنشرح بإذن الله ص والصفات والزمر أعلي تلت سور في القرآن الكريم كله في المقامات الإيمانية ، أعلي توجيه إيماني في القرآن كله ، الصفات و ص والزمر آخر المقامات الإيمانية ، وهنشرح الترابط ما بينهم وبين كل الأشواط اللي فاتت بإذن الله أقول قولي هذا وأستغفر الله لي ولكم ، سبحانك اللهم وبحمدك أشهد أن لا إله إلا أنت أستغفرك وأتوب إليك  
 تم بحمد الله

شاهدوا الدرس للنشر على النت في قسم تفريغ الدروس تفضلوا هنا :

<http://www.way2allah.com/forums/forumdisplay.php?s=d5fa851b936c6742ef5d2ac53524ee58&f=36>